

ՀՈՎՀԱՆՆԵՍ ԴՐԱՍԽԱՆԱԿԵՐՏՑԻՆ ՀԱՅՈՑ ՊԵՏԱԿԱՆՈՒԹՅԱՆ ԳԱՂԱՓԱՐԱՆՈՍ ԿԱԹՈՂԻԿՈՍ*

ՎԱՐԴԱՆ ԱԼԵԿՍԱՆՅԱՆ

Բանալի բառեր՝ Հովհաննես Դրասխանակերտցի, Սմբատ Ա, Աշոտ Երկաթ, Յուսուֆ, միասնություն, հաշտարար միջնորդություն, իշխաններ, ներիշխանական կոիվներ, քաղաքական ամբողջություն, գաղափարախոս, հալածանք, նամակադրություն, Բյուզանդիա, Դվին, Վասպուրական, արաբական ասպատակություն:

Նախաբան

IX դարի վերջին և X դարի առաջին քառորդին նորաստեղծ հայկական պետականության պահպանման համար պայքարում կարևոր դերակատարություն է ունեցել միջնադարյան Հայաստանի կրոնական ու քաղաքական նշանավոր գործիչ, պատմաբան, կաթողիկոս Հովհաննես Դրասխանակերտցին (898–925): Նա հայոց անկախ թագավորության հռչակման (885) ականատեսներից էր ու Հայաստանի քաղաքական ամբողջականության համար մղվող պայքարի գործուն մասնակիցը: Դրասխանակերտցին գործել է դարաշրջանային բնույթ ունեցող մի պատմափուլում, երբ արտաքին և ներքին թշնամիների դեմ պայքարում վճռվում էր հայոց պետականության շարունակականության հարցը: Երկրի քաղաքական իշխանությունը ի դեմս հայ Բագրատունիների, եկեղեցու հետ դաշնակցած վարում էր Հայաստանի համակենտրոնացման քաղաքականություն, որը բխվում էր դարաշրջանին բնորոշ տեղական ավատատիրական իշխանությունների ապակենտրոն նկրտումներից: Հայաստանում տեղի էր ունենում քաղաքական համակարգի կերպափոխում. կենտրոնաձիգ պետությունը վերածվում էր տեղական իշխանությունների ավատատիրական դաշնության¹: Զգտելով անկախ իշխանությունների ստեղծման՝ հայ նախարարական տները դավադրություններ էին լարում և՛ թագավորի, և՛ միմյանց դեմ, մեկմեկու ձեռքից հափշտակում էին կալվածներ, բերդեր, «թագավոր»-ի տիտղոս ստանալու համար անցնում թշնամու կողմը: Երկրում բացակայում էր համընդհանուր շահի գիտակցումը:

* Ներկայացվել է 25. I. 2023 թ., գրախոսվել է 30. I. 2023 թ., ընդունվել է տպագրության 19. VI. 2023 թ.:

¹ Ե Ղ Ի ա զ ա Ր յ ա ն. 2016, 98–99:

Հովհաննես Դրասխանակերտցու հոգևոր-քաղաքական գործունեությունը սկիզբը

«Պատմաբան» անունով հայտնի Դրասխանակերտցին իր ծանր և հալածական կյանքի համար ստացել է «Մաշեալ» մականունը²: Մատենագիրները նրան հիշում են նաև Հովհաննես Դվնեցի, Հովհաննես Գառնեցի անուններով³: Սակայն նա հայտնում է, որ ինքը «հայրենաւք ի մեծ դաստակերտէ Դրասխանակերտէ» է⁴, և ենթադրաբար ծնվել է IX դարի 40–50-ական թվականներին: Ապագա կաթողիկոսն «ի մանկութենէ» աշակերտել էր ժամանակի նշանավոր հոգևոր գործիչ Մաշտոց վարդապետին, որին, ինչպես ինքն է ասում, եղել է «արեան հարազատ եւ մերձաւոր»: IX դարի 60-ական թվականներին Դրասխանակերտցին ուսանել է Արտավազդի և Սևանի վարդապետաբաններում և, ինչպես վկայում է Թովմա Արծրունին, «անեալ եւ ուսեալ առ ոտս սրբոյն Մաշտոցի, նորին հրահանգեալ կրթարանի ուսումնասիրութեանն վարժիւք ոռոգացեալ, այր քաղցրաբարոյ եւ հեզահայաց»⁵: Ստույգ տեղեկություններ չկան, թե որոնք են եղել «կրթարանի ուսումնասիրութեան վարժությունները», սակայն Սևանի ճգնակյաց վանականից նա, անշուշտ, ստացել է խիստ կրոնական կրթություն, դարձել քաջածանոթ Սբ. Գրքին և հայ մատենագրությանը, ուսումնասիրել հին աշխարհի գրականությունն ու փիլիսոփայությունը, վարժվել հռետորական արվեստին⁶: Սյունյաց հռչակավոր վարդա-

² Մանր ժամանակագրություններ, XIII–XVIII դդ. 1956, 336, Ա ճ ա ու - յ ա ն. 1946, 558:

³ Ասողիկը հայտնում է, որ Հովհաննես կաթողիկոսը Դվնեցի է (Ա ս ո ղ ի կ. 2010, 742: Հմմտ. Ս տ ե փ ա ն ն ո ս ի Ս ի ւ ն ե ա ց ե պ ի ս կ ո պ ո ս ի. 1861, 184): Այլ մատենագիրների վկայություններով՝ Հովհաննես Դրասխանակերտցու ծննդավայրը Գառնին է (Ա ն ե ց ի եւ շ ա ր ու ն ա կ ո ղ ն ե ր. 2014, 169, Գ ա ն ճ ա կ ե ց ի. 1961, 82): Պատմաբան Պ. Հովհաննիսյանի ենթադրությամբ՝ այս երկու բնակավայրերի հիշատակությամբ հեղինակները ձգտել են մեծացնել կաթողիկոսի ծննդավայրի նշանակալիությունը:

⁴ Դրասխանակերտցի. 2010, 608–609: Պատմահայր Խորենացու հավաստմամբ՝ Դրասխանակերտն եղել է «գմեծ դաստակերտն Արտաշիսի», որը Տրդատ Մեծը (298–330) ժառանգության իրավունքով շնորհել է քրիստոնեությունը ընդունած Կամսարի տոհմին (Խ ո Ր Ե ն ա ց ի. 1991, 241: Հմմտ. Եղիշէի վասն Վարդանայ եւ հայոց պատերազմին. 1957, 79): Դրասխանակերտը, ըստ հայագետ Ա. Սահակյանի, երվանդ Վերջինի (220–201) Շիրակում կառուցած հոգևոր մայրաքաղաք Բագարան քաղաքի վաղ պաշտոնական անունն է, որը IX դարից դառնում է Բագրատունիների առաջին մայրաքաղաք: Նա հիմնավորում է Դրասխանակերտ և Շիրակի Բագարան քաղաքների նույնությունը՝ նշելով, որ միևնույն քաղաքի երկու անվանումներից վաղ պաշտոնականը Դրասխանակերտն է, իսկ ժողովրդականն ու ավելի ուշ պաշտոնականը՝ Բագարանը (Ս ա հ ա կ յ ա ն. 2005, 295–302): Պատմաբան Ա. Փերիխանյանի ստուգաբանությամբ՝ Դրասխանը երվանդ Աստծո քրմական-վարդապետական մակրիրն է, նշանակել է «արևի հայացք» (Периханян. 1993, 32–34):

⁵ Արծրունի եւ Ա ն ա ն ու ն. 2010, 228, 249:

⁶ Աբեղյան. 1968, 480, Բախչինյան. 1973, 43: Հին աշխարհի գրականությունն ու փիլիսոփայությունը Դրասխանակերտցու ծանոթ լինելու մասին է վկայում այն փաստը, որ իր «Պատմության» մեջ մի քանի անգամ հիշատակում է

պետարանի ավանդույթները շարունակող կրթարանում, որն ապահովված էր «զբաղմունքի զրոյց սրբոց»-ով, հոգևոր առարկաներից բացի, դասավանդվել են քերականություն, փիլիսոփայություն և ճարտասանություն, այսինքն՝ եռյակ արվեստները: Անանուն Արծրունին Հովհաննես Դրասխանակերտցուն բնութագրում է «զաւրաւոր եւ մտահարուստ հոետոր»⁸: Ասողիկը նրան անվանում է «ճարտասան», իսկ Կիրակոս Գանձակեցին «այր իմաստուն և բանաւոր»⁹: XVII դարի ժամանակագիր Դավիթ Բաղիշեցին նրան բնորոշում է «անյաղթ փիլիսոփայ եւ պատմագիր»¹⁰, XII դարի մատենագիր Սամվել Անեցին բարձր է գնահատում նրա ստեղծագործությունն ու այն որակում «Գեղեցկաբան շարադրութիւն»¹¹:

Դրասխանակերտցու՝ մինչկաթողիկոսական շրջանի գործունեության մասին հայտնի է, որ Գևորգ Բ Գառնեցի (877–897) կաթողիկոսի օրոք նա «եպիսկոպոս դրան» կարգավիճակով հայրապետանոցի պաշտոնեության անդամ էր: Երբ 894 թ. Ատրպատականի ամիրա Աֆշինը բանտարկեց հայտաւար առաքելութեամբ իր մոտ եկած Գևորգ Գառնեցուն, կաթողիկոսարանի գործերի վարչությունն ամբողջովին իրականացնում էր Հովհաննեսը¹²: Նա հավաքագրեց պահանջված փրկագինը և, Աղվանքի Համամ իշխանի միջոցով փոխանցելով Աֆշինին, բանտից ազատեց կաթողիկոսին: 897 թ. Գևորգ Գառնեցու մահից հետո, կաթողիկոս է ընտրվում Դրասխանակերտցու ուսուցիչ և «ըստ մարմնոյ» նրան ազգակից Մաշտոց Եղիվարդեցին: Վերջինիս կաթողիկոս դառնալու գործում նույնպես կարևոր դեր է ունեցել Հովհաննես եպիսկոպոսը, ով մեծ ազդեցություն ուներ վեհարանի պաշտոնեության վրա¹³: Սակայն Մաշտոցին վիճակված չէր երկար պաշտոնավարել, և յոթ ամիս անց նա մահանում է: 898 թ.¹⁴ Սմբատ Ա (890–914) արքայի և «նախարարակոյտ բազմութեան» պահանջով հայրապետական գահին է նստում Հովհաննես Դրասխանակերտցին¹⁵:

Նորընծա կաթողիկոսը հենց սկզբից բախվում է Ատրպատականի Սաջյան ամիրա Աֆշինի մեքենայություններին, որը փորձում էր Հայաստանում ներ-իշխանական հակասություններ հրահրելու և հայոց արքայի դիրքերը թուլացնելու միջոցով կասեցնել զորեղացող պետականության ընթացքը: Սադրանքներով և քսություններով Աֆշինին հաջողվում է թշնամություն բորբոքել

Հոմերոսին և նրա «Իլիականը», մեջբերումներ կատարում Սուրենից (Ք. ա. 638–558 թթ.) (Դրասխանակերտցի. 2010, 372, 508, 511):

⁷ Ասողիկ. 2010, 742:

⁸ Արծրունի եւ Անանուն. 2010, 281:

⁹ Գանձակեցի. 1961, 82:

¹⁰ Մանր ժամանակագրություններ, XIII–XVIII դդ. 1956, 336, Բախ-չիւնյան. 1973, 43:

¹¹ Անեցի եւ շարունակողներ. 2014, 155:

¹² Չամչյան. 1984, 717:

¹³ Օրմանեան. 2001, 1187, Բախչիւնյան. 1973, 43:

¹⁴ Եղիվարդյան. 2014, 46, Եղիվարդյան. 2020, 170:

¹⁵ Պ. Անանյանը հայտնում է, որ Հովհ. Դրասխանակերտցու ընտրության առիթով Կ. Պոլսի Անտոն Բ պատրիարքը (893–901) 897 թ. Սմբատ Ա-ին նամակով պատվիրում է հայոց նոր կաթողիկոսի ձեռնադրությունը կատարել Կ. Պոլսում: «Այս յանձնարարութիւնը առաջին բացայայտ արտայայտությունն է Քաղկեդոնի 28-րդ կանոնին կարգադրութեան, որ Հայ եւ Արեւելքի բոլոր «միաբնեայ» եկեղեցիները մերժած էին», – գրում է Պ. Անանյանը (Անանեան. 1997, 57):

Արծրունի իշխանների միջև: Սմբատ Ա-ի հորդորով Հովհաննես կաթողիկոսը հանդիպում է հակամարտող իշխաններին՝ հուսալով «թերեւս կարողութիւն լիցի փակել զկորստական դուռնն»: Արյունակից Արծրունիներ Աշոտին և Հասանին հաշտեցնելու համար պատվախնդիր կաթողիկոսը ստիպված է լինում դիմել կտրուկ միջոցների՝ ընդհուպ «զաւետարանական իշխանութիւնն գործարկեալ»:

Հայոց կաթողիկոսի Ատրպատականյան բանազնացությունը Աֆշինի մահից հետո՝ 901 թ., Ատրպատականի ամիրայության գլուխ է անցնում նրա եղբայր Յուսուֆ իբն արու Սաջ Դեդադը, որը մտադիր էր ձեռք բերել Հայաստանից խալիֆայությանը վճարվող հարկերը գանձելու իրավունքը: Հասկանալով, որ այդ ամենը կարող է խաթարել երկրի բարեկեցությանն ու անվտանգությանը՝ Սմբատ Ա-ն 902 թ. դիմում է Ալի ալ-Մուքթաֆի Բիլլահ խալիֆին (902–908) և իրավունք ստանում հարկերն ուղարկել Բաղդադ՝ առանց Ատրպատականի սաջանների միջնորդության¹⁶: Սակայն Յուսուֆը մտադիր էր հրաժարվել Հայաստանի նկատմամբ ունեցած իր հավանություններից, ուստի Ադվանքի վրայով արշավում է Հայաստան: Սմբատը հարկադրաբար ընդունում է Յուսուֆի՝ հարկերն Ատրպատականի միջոցով վճարելու պայմանը: Արժեքավոր նվերներ փոխանակելով՝ նրանք 903 թ. խաղաղության դաշինք են կնքում, որը նպաստավոր էր նաև Հայ եկեղեցու համար: «Բայց եւ ես եւս պատուեցայ պատուասիրաբար յոստիկանէն զգետտուք ըստ աւրինի կարգիս. եւ ջորի պաճուճաբար ոսկեզաւծ զարդուք առաջի մատուցանելով ինձ»¹⁷, – խոստովանում է պատմաբան կաթողիկոսը: Հայոց կաթողիկոսին մեծարանքի և պատիվների արժանացնելը վկայում է ոչ այնքան Յուսուֆի քաղաքավարության, որքան հայոց հոգևոր առաջնորդի հեղինակության և ազդեցության մասին: Սաջան ամիրան կարևորում էր Հայոց կաթողիկոսի դերը երկրի կյանքում և արտաքին հարաբերություններում: 903-ից մինչև 908 թ. այն եզակի ժամանակահատվածներից մեկն է, երբ Հայաստանը զարգացման հնարավորություն է ստանում, և երկրի ընդհանուր բարօրության պայմաններում իշխանները «չինչին եկեղեցիս վիմարդ հաստահեղոյս ձուլեալ կրով ի մենաստանս եւ յաւանս եւ յազարակս»¹⁸: Արդեն 908 թ. Հասան Հավնունի իշխանի գլխավորությամբ Սմբատ Ա արքայի դեմ կազմակերպվում է դավադրություն, որը բացահայտվում է, և Երազգավորսում արքայի «խողխողման» ծրագիրը՝ տապալվում:

Հայաստանը տրոհելու և թուլացնելու Յուսուֆի ձեռնարկները գործնական արդյունք են տալիս 908 թ.: Նախճավան քաղաքի համար Սյունի և Արծրունի

¹⁶ Հայոց թագավորի առաջարկը շատ ձեռնտու էր խալիֆին, որովհետև այդպես կթուլանային Յուսուֆի դիրքերը, որն ընդլվել էր խալիֆի դեմ անկախանալու նպատակով: Ալ-Մուքթաֆի խալիֆն ուրախությամբ է ընդունում հայոց արքայի առաջարկը և «երեւելի զգեստ արքունական եւ թագ արքայական», բազմաթիվ այլ ընծաներով հանդերձ ուղարկում է Սմբատ Ա-ին: Հայաստանից Աբբասյաններին վճարվող հարկի չափը տարեկան կազմում էր 60 հազ. դիրհեմ, որը մեծ գումար էր: Հայաստանն ամբողջությամբ իր կողմը դրավելու համար խալիֆը կրճատում է անգամ այդ գումարը (Тер-Гевондян. 1977, 243):

¹⁷ Դրասխանակերտցի. 2010, 480:

¹⁸ Դրասխանակերտցի. 2010, 481:

նախարարների վեճը հարմար առիթ էր Սաջյան ամիրայի համար՝ տրոհելու Հայաստանի քաղաքական միասնությունը: Նախճավանը Սյունիներին հանձնելու Հայոց արքայի վճռից խիստ դժգոհ Վասպուրականի իշխան Գագիկ Արծրունին «բազում նուէրս ընծայից եւ պատարագաց պատրաստեալ» ներկայանում է Յուսուֆին: Վերջինիս շատ ձեռնտու էր «քակտումն միաբանութեան նոցա (հայերի— Վ. Ա.)», և նա 908 թ. Գագիկ Արծրունուն թագադրում է որպէս Վասպուրականի թագավոր¹⁹: Վերջինս «թագակերպեալ»²⁰ վերադառնում է «յաշխարհ իւրոյ տերութեանն»՝ «զկորստական դուռն» բացելով Հայաստանի համար: Այս դեպքերից հետո սպասվում էր Սաջյան ամիրայի հրոսակախմբերի արշավանքը Հայաստան: Ատրպատականի ամիրային Հայաստանի վրա արշավելու մտքից ետ պահելու դիվանագիտական առաքելությամբ 908 թ. վերջին «Սմբատայ եւ այլոց եւս նախարարացն սադրելոյ» Հովհաննես կաթողիկոսը ուղևորվում է Ատրպատական: Նա ճանապարհվում է մեծաքանակ և մեծարժեք նվերներով, որոնց մասին հայտնում է հետևյալը. «Գնացի ի Պարսս Ատրպատականի առ ոստիկանն դառնացաւ ընծայիւք եւ պատարագաւք բազմաւք յարքունի թանգարանաց, երեւելի ոսկեճամուկ զգեստուք եւ ի նկարակերտ կանանց ոստայնանկութեանց բազում բազմականս կազմեալ, եւ բազում ձիս եւ ջորիս ի զարդս եւ ի զէնս յարդարեալ, այլ եւ գանձս ոսկոյ եւ արծաթոյ»²¹: Կաթողիկոսի նվերների մեջ կային նաև եկեղեցական գանձարանների թանկարժեք մասունքներ, որոնք ձեռք էին բերվել «ի տանէ սրբարանաց»: Սաջյանների ազահուլթյանը լավատեղյակ կաթողիկոսն այդ կերպ փորձում էր հագուրդ տալ նրանց ընչաքաղցովթյանը, կանխել «զբլիտումն թունից նորա եւ զխառատումն քարանց եկեղեցւոյ սրբոյ եւ զկորստական գերչութիւն ժողովրդոց Քրիստոսի, մարթաքից հետի աղաքս ինչ խաղաղութեան առ ի նմանէ գտանել»²²: Շքեղ ընծաներով ժամանած Հայոց հոգևոր առաջնորդը պատվավոր ընդունելությամբ և մեծարանքների է արժանանում Յուսուֆի արքունիքում: Նա Հայաստանին խաղաղություն է խոստանում և հանձն առնում հաստատել հաշտություն: Սակայն քիչ անց, «մահացու խարդախութեամբ վտարանդեալ», անակնկալ փոխում է մտադրությունը, կալանավորում հայրապետին՝ բանտարկելով «ի խաւարչտին տեղւոջ եւ շրջապատեալ բազում պահնակաւք»: Այս կտրուկ շրջադարձի պատճառը

¹⁹ Անանուն Արծրունին հաղորդում է, որ Յուսուֆը ոչ միայն թագավորական թագ ու պատիվներ շնորհեց Գագիկին, այլև հռչակեց «թագաւոր ամենայն Հայոց» (Արծրունի եւ Անանուն. 2010, 282): Անանունից բացի, ոչ մի այլ պատմիչ Գագիկին Հայոց թագավոր չի կոչում (Հովհաննեսի սյան. 2014, 115–117): Իրավացի է Վրեժ Վարդանյանը, երբ գրում է, թե Գագիկ Արծրունու՝ ամենայն Հայոց թագավորի տիտղոսը, ըստ էության, «Վասպուրականում տիրող մտայնության արգասիք էր» (Վարդանյան. 1969, 79): Ստ. Օրբելյանի վկայությամբ՝ մինչ այդ Աֆշին ամիրան թագ էր առաջարկել նաև Սյունիքի իշխան Վասակին, սակայն վերջինս «ոչ կամեցաւ ապստամբական անուն ժառանգել» (Ստեփաննոսի Սիւնեացի պիսկոպոսի. 1861, 219):

²⁰ Հեզնական այս ձևակերպումով Դրասխանակերտցին իր բացասական վերաբերմունքն է արտահայտում Գագիկի նկատմամբ:

²¹ Դրասխանակերտցի. 2010, 488:

²² Դրասխանակերտցի. 2010, 488:

կաթողիկոսը ստույգ չի կռահում, սակայն ենթադրում է, որ դա հետևանք էր «ի սաղրելոյ նմա ի մերոց աստի»²³: Հավանաբար, նա ականարկում է Սմբատին ընդդիմադիր որոշ հայ նախարարների, որոնց սաղրանքով Յուսուֆը բավարար չի համարում մատուցված զանձերն ու գումարը: Կաթողիկոսի պատանդառության փաստը թույլ է տալիս ենթադրել, որ նա Սաջյան կառավարիչներին ոչ միայն նվերներ էր տարել, այլև Հայաստանից հավաքագրված հարկը: Սակայն, ինչպես ցույց են տալիս հաջորդող դեպքերը, Յուսուֆը ստացվածն անբավարար է համարել, և կաթողիկոսին պատանդ վերցնելով պահանջել է փրկագին մեծ գումարներ:

Որոշ ժամանակ անց Յուսուֆին են ներկայանում Գուրգեն և Գագիկ Արծրունիները, որոնք «գպարտս մտերմական սակին վճարեալ, եւ լիսպատար թանգարանաց իմն նմա ընծայաբերեալ»²⁴: Նրանք պետք է մասնակցեին Յուսուֆի՝ Հայաստան կատարելիք արշավանքին: Հայոց հայրապետը հույս ուներ, որ Գագիկը, «որպէս եւ քրիստոնեական պարտն պահանջէ», կմիջնորդի իրեն ազատ արձակելու համար, սակայն վերջինս, նրան համարելով Սմբատի աջակից, ոչինչ չի անում: Հայոց հոգևոր առաջնորդին արաբական զերուկյան մեջ օգնության ձեռք չմեկնելու փաստը թույլ է տալիս ենթադրել, որ կաթողիկոսի ատրպատականյան օրակարգի հարցերից մեկը եղել է Գագիկի՝ Հայոց թագավոր դառնալու խափանումը: Գագիկը դեռևս այդ ժամանակ Վասպուրականի թագավորն էր (908–943), նրա հաջորդ քայլը պետք է լիներ Հայոց թագավոր նշանակվելը: Պատմիչների վկայությամբ՝ 913–914 թթ. Յուսուֆը երկրորդ անգամ արդեն Գագիկին թագադրում է Հայոց թագավոր²⁵:

909 թ. գարնանը Ստ. Օրբելյանի բնութագրմամբ՝ «զազանն անգառազեղ և շունն կատաղի» Յուսուֆի՝ մեծ հրոսակախմբով մտնում է Հայաստան և ասպատակում Սյունիքը: Նա ավերում ու «արյան բաղնիքի է վերածում» երկրամասը²⁶: Այստեղից Յուսուֆն արշավում է Դվին, որտեղ նրան անձնատուր են լինում Սյունյաց իշխաններ Գրիգոր Սուփանը և Վասակը: Արաբ ոստիկանը Սմբատից նոր հարկեր է պահանջում, հետապնդում նրա ուժերին մինչև Կղարջքի կողմերը: Շղթայված կաթողիկոսին Յուսուֆը, Հայաստանում բանտից բանտ տեղափոխելով, նպատակ ուներ բարոյալքել հայերի դիմադրական ուժը և ահաբեկել ժողովրդին: Դվինի բանտում կաթողիկոսն անմարդկային կտտանքների է ենթարկվում. «Իսկ զիս արգելեալ ի քաղաքին Դվին ի մետաղս բանտից եւ երկաթի կապարանաց, կրեցի այնուհետեւ ի դահճաց անտի

²³ Յուսուֆը վստահ էր, որ առանց հոգևոր առաջնորդի Հայաստանում կտիրի անիշխանություն (Г р е н. 1893, 87):

²⁴ Դ ր ա ս ի ա ն ա կ ե Ր տ ց ի. 2010, 489:

²⁵ Գագիկ Արծրունու՝ Հայոց թագավոր թագադրվելու մասին վկայում է նաև Հովհ. Դրասխանակերտցին՝ ասելով, որ Փարկինի զորապետի միջոցով խալիֆը թագ է ուղարկում Գագիկին և «երեքկին զնա պսակեալ ի վերայ Հայաստանեայցս» (Դ ր ա ս ի ա ն ա կ ե Ր տ ց ի. 2010, 545–546): Ըստ Ասողիկի՝ Գագիկի թագավորության սկիզբը 914 թ. է, քանի որ նա թագավորել է Իթ (29) տարի, մինչև ՅՂԲ (943) թվականը (Ա ս ո Ղ ի կ. 2010, 826):

²⁶ Յուսուֆի ներխուժումը Սյունիք տեղի է ունեցել «358 թուականին Հայոց» (909 թ.) «յառուրս սուրբ պսակքին» (Ս տ ե փ ա ն ն ո ս ի Ս ի լ ն ե ա ց ե պ ի ս կ ո պ ո ս ի. 1861, 135–136):

մահահոտ իմն լուտանաւք զանս եւ բանտս եւ գերարանս եւ արգելարանս ի խաւարչտին տեղւոջ եւ յանձուկ վայրս. այլ եւ ի վիրապս եւ ի վիհս խորոց ընկեցայ սաստիկ եւ դառն կտտանաւք: Եւ պահապանացն սաստիկ աղաղակն ու ճուհն դատափետ միշտ ոչ հեռացեալ հատանէր ի լսելեաց իմոց յերեկոյէ մինչեւ ցառաւաւտն, եւ սակս այնորիկ բարձեալ էր յինէն նինջ արտեւանաց եւ հանգիստ իրանաց իմոց»²⁷: 909–910 թթ. անցկացնելով ազատագրութեան մեջ՝ կաթողիկոսը դիմում է ոստիկանին և խնդրում «ելս հրաման թողութեան»: Նա գերութեան մեջ իր վիճակը համեմատում է եգիպտական թագավոր Նեկտանեբոսի հետ, որին աստվածները թաքցրել էին ստորգետնյա թագավորութիւնում, և ինչպես Նեկտանեբոսն աստվածների օգնութեամբ «փախեաւ գաղտաբար» պարսիկներից, այնպես էլ իրեն «վերին աւգնականութիւնն առ ի նմանէն (Յուսուֆ ոստիկանից – Վ. Ա.) կորցեաց»²⁸: Հավանաբար, հենց 910 թ. պատմաբան-կաթողիկոսը փախչում է Դվինի բանտից: Նրա փախուստի հանգամանքները հայտնի չեն: Լեոն ենթադրում է, թե, իբր, Աշոտ Շապուհյանի անձնատուլութեան թողած ազդեցութեամբ Յուսուֆը բանտից ազատ է արձակել Հայոց կաթողիկոսին²⁹: Սեփական արժանապատուութիւնը բարձր գնահատող հայրապետը պարզաբանում է, որ ինքը ձգտում էր դուրս գալ բանտից ոչ թե մահվան վախից կամ խուսափում էր հավատի համար նահատակվելուց, «այլ վասն զի սակս ոսկւոյ տնաւրինէր»: Բանտում եղած ժամանակ «ի բազմաց աւգնականութենէ» նա բավականին գումարներ էր վճարել, սակայն «զգրադատ գանձուց» մի մասը դեռեւս մնում էր: «Այլ ոչ եւս ունէի բնաւ ի ձեռին բաւականի հատուցանել ինչ, եւ ոչ ոք էր որ աւգնէր ինձ»³⁰, – ցավով խոստովանում է կաթողիկոսը: Փախուստը հասկանալիորեն բարդացրեց Յուսուֆի ու կաթողիկոսի միջև ոչ դյուրին հարաբերութիւնները: Եվ նա հարկադրված էր չլքել գավառներում, քաղաքներում ու հավաքել պահանջվող տուրքի մնացյալ մասը: Այդ գումարի հավաքագրումն անհրաժեշտ էր բանտում պահվող բազմաթիւ հայ իշխանների փրկութեան և Սաջյանների ասպատակութիւններից Հայաստանը ժամանակավորապես զերծ պահելու համար:

Դեգերելով «ի քաղաքէ ի քաղաք»՝ կաթողիկոսն անցնում է Աղվանից երկիր³¹, որտեղ հյուրընկալվում է Սահակ Սևադա իշխանին և Աղվանքի Ատրներսէ թագավորին, որոնք նույնպես «ի ժողովրդենէ մերմէ եւ խաչն արաւտի

²⁷ Դրասխանակերտցի. 2010, 490: Դվինում իրականացված հնագիտական պեղումների ժամանակ բացվել են ստորգետնյա հորեր, որոնք ունեին 2,50 մ խորութիւն, իսկ հատակի տրամագիծը եղել է 3,20 մ: Հորաբերանին դրված է եղել սալաբար: Դրանք ցամաք հորեր էին, վիհ կամ վիրապ, որոնք կոչվում էին նաև զնդան: Այդ զնդաններում պահում էին ծանր հանցագործներին: Աղապիսի մի զնդանում են պահվել Դրասխանակերտցին և հայ բազմաթիւ իշխաններ (Ղաֆաղաբյան. 1982, 24–25):

²⁸ Դրասխանակերտցի. 2010, 492, Դարբինյան-Մելիքյան. 1981, 161:

²⁹ Լեո. 1967, 543:

³⁰ Դրասխանակերտցի. 2010, 492:

³¹ Եթե Յուսուֆն ինքը բանտից ազատ արձակած լինէր կաթողիկոսին, ապա հազիվ թե վերջինս հեռանար Հայաստանից, անցներ Աղվանք, ապա՝ Վրաստան (Վարդանյան. 1988, 117):

մերոյ էին»³²: Դրասխանակերտցին ծանոթ էր Աղվանքի իշխաններին, քանի որ մինչ այդ նա Գևորգ Գառնեցու (877–897) փրկագնման առիթով հավաքագրված գումարը ինքն էր հասցրել Աղվանք և փոխանցել Համամ իշխանին³³: Եվ հենց ազգակցության իրավունքով էլ նա բավականին գումարներ է հավաքագրում՝ պարտքերը վճարելու և իր հետևորդներին պահելու համար. «Եւ ի նոցանէն ոչ ինչ սակաւ ծախս ուծկաց ըստ իւրաքանչիւրումն սակի կարգէր մեզ պարտապանաբար վճարելով զպէտս ամենեցունց»³⁴: Աղվանքից կաթողիկոսը տեղափոխվում և բնակություն է հաստատում Գուգարքում՝ «ակն ունելով փրկութեան»: Նրա երկարատև շրջագայությունների ընթացքում Յուսուֆի հրամանով Դվինում 914 թ. չարանենգ եղանակով գլխատվում է Հայոց Սմբատ արքան: Հովհաննես կաթողիկոսն արքայի նահատակության առիթով սահմանում է հատուկ տոն³⁵:

Դեռևս հոր՝ Սմբատ Ա-ի կենդանության օրոք թշնամու դեմ պայքար էր սկսել Աշոտ Թագաժառանգը, ով «ըստ քաջապինդ արութեան իւրոյ երկաթ անուանեցաւ»³⁶: Աշոտն ազատագրում է Հայաստանի զգալի մասը, ոչնչացնում բազմաթիվ արաբ հրոսակախմբեր և վերագրավում բոլոր այն ամրոցները, որոնք Յուսուֆը խլել էր հորից: 914 թ. Սմբատ Ա-ի եղբորական նահատակությունից հետո, Հայոց ավագանին թագավոր է ճանաչում Աշոտ Բ-ին (914–928), որին թագադրում է Կղարջքի թագավոր Ասորներսեհ (899–923)³⁷: Աշոտ Բ-ի նախաձեռնած համաժողովրդական պայքարում աչքի են ընկնում բազմաթիվ նահատակներ՝ Միքայել Գուգարացին, Դավիթ ու Գուրգեն Գնունի եղբայրները և ուրիշներ, որոնց համար կաթողիկոսը մարերի ամսի 27-ը հիշատակի օր է սահմանում: Ցավոք, տոնացույցերը հիշյալ մարտիրոսների տոնը չեն նշում, իսկ «Յայտնավուրք»-ում կա միայն Գնունի եղբայրների հիշատակի օրը՝ մարերի 20-ին կամ մայիսի 27-ին, ինչը շարժական տոմարով հունվարի 25-ին է³⁸: Երկրի վիճակը շատ ծանր էր, բայց «այդուհանդերձ Դրասխանակերտցու հարկադրական թափառումներն արաբական հալածանքների պատճառով երկարաձգվում էին, և «ակն կարեալ եւ սպասեալ փրկութեան», նա գտնվում էր Գուգարքում, «մերձ առ մեծիմաստն Ասորներսեհ թագաւորն կացելոյ յայնմ նահանգի»³⁹:

³² Դրասխանակերտցի. 2010, 492: Ուշագրավ այս բնորոշմամբ կաթողիկոսը շեշտում է Հայոց եկեղեցու գերակայությունն Աղվանքի եկեղեցու նկատմամբ և հայերի հետ նրանց մեկ ընդհանուր կրոնական համայնք լինելու հանգամանքը (Սարգսյան. 1991, 135):

³³ Drashanakertci. 1987, 12.

³⁴ Դրասխանակերտցի. 2010, 492:

³⁵ Յայտնավուրք. 1730, Մարերի Ի և մայիսի ԻԷ:

³⁶ Ասողիկ. 2010, 748: Աշոտի անսովոր մեծ ֆիզիկական ուժի մասին են վկայում նաև բյուզանդական հեղինակները (Թեոփանեսի շարունակող. 1990, 228):

³⁷ Եղիազարյան. 2016, 24–25:

³⁸ Յայտնավուրք. 1730, Մարերի Ի և մայիսի ԻԷ, Օրմանեան. 2001, 1217:

³⁹ Դրասխանակերտցի. 2010, 521: Գուգարքը Կղարջքի թագավորութ-
յան մաս էր կազմում, իսկ Կղարջքի թագավոր Ասորներսեհն արդեն հորջորջվում

Հայ-բյուզանդական հոգևոր առաջնորդների նամակագրութ- յունը

Հարավային Կովկասում տեղի ունեցող իրադարձություններին ուշադիր հետևող բյուզանդական իշխանությունները շտապում են օգտվել պատեհ իրավիճակից: Նրանք զանազան միջոցներով խրախուսում են այդտեղ ապրող ժողովուրդների ազատագրական պայքարն արաբական տիրապետության դեմ: Դա հետագայում Արևելքում Բյուզանդիայի ազդեցիկ քաղաքականութ-
յան սկիզբն էր⁴⁰: Բյուզանդիայի նվաճողական քաղաքականության մեջ մեծ դերակատարություն ուներ կայսերական եկեղեցին, որն այդ ժամանակ գլխա-
վորում էր պատրիարք Նիկողայոս Միատիկոսը (901–907, 912–925): Վերջինս 913 թ. արքունիքի հանձնարարությամբ նամակ է գրում Հայոց կաթողիկոսին՝ սկիզբ դնելով հայ-բյուզանդական եկեղեցական նոր երկխոսության⁴¹: Բարե-
կամական ոճով շարադրված այս նամակը, Լեոյի բնորոշմամբ, «դիվանագի-
տական գրություն»⁴² է, որում Պոլսի քահանայապետը եկեղեցական կամ դա-
վանական միաբանության խնդիրներ չի արծարծում: Զգացմունքային և մխի-
թարական խոսքերով լի այս նամակը կովկասյան ժողովուրդների հակաարա-
բական շարժումները խթանելու նպատակ էր հետապնդում: Ողջունելով «Հա-
յոց Մեծաց» կաթողիկոս Հովհաննեսին՝ կայսերական եկեղեցապետն արտա-
հայտում է իրենց «յոթ տրտմութիւն»-ը Հայաստանին, Վիրքին և Աղվանքին
պատուհասած դժբախտությունների առթիվ: Ստեղծված վիճակի պատճառը,
ըստ նրա, այդ երկրների իշխանների միջև ներքին համաձայնության և համե-
րաշխության բացակայությունն է: Նա փրկությունը տեսնում է միայն իշ-
խանների միաբանության մեջ և թախանձում «յաւեստ սիրելի եղբաւր մերում»
Հովհաննեսին ամեն ջանք գործադրել «դադարեցուցանել գոնէ ի հակառա-
կութենէ չարութեանդ որ ընդ միմեանս. եւ մի տալ թոյլ մնալ ի վայրենի գա-
զանութեանդ, որք բարկացեալք եւ դիմեալք են ի սպանումն միմեանց եւ
դառնալ ի մարդկային մտածութիւնս եւ ի քրիստոնէական հանդարտու-
թիւնս»⁴³: Պոլսից քրիստոնեական համերաշխության կոչերով նամակներ են
հղվել նաև Վրաց թագավոր Ատրնեբսեհին, Աբխազաց թագավոր Կոստանդին
Գ-ին (893–922)՝ հորդորելով նրանց դադարեցնել բախումները և միաբանել
սիրով ու հաշտությամբ: Միասնական ուժերով նրանք պետք է մարտնչեն
«ընդդէմ ամբարիշտ թշնամւոյն որդւոյն Ապուսիճայ»: Միայն այդ դեպքում

էր «Վրաց թագավոր» (Եղիազարյան. 2011, 217): Իր մեկ այլ աշխատութ-
յան մեջ Ա. Եղիազարյանը կարծիք է հայտնում՝ Գուգարքում այդ ժամանակ
ապրում էին Հայ եկեղեցու հետևորդներ, որոնց վրա տարածվում էր Հայոց կաթո-
ղիկոսի հոգևոր իշխանությունը (Եղիազարյան. 2018, 68):

⁴⁰ Բարթիկյան. 1966, 252:

⁴¹ Կարեն Յուզբաշյանը վստահ է, որ պատրիարքի նամակը պահպանվել է բնա-
գրային թարգմանությամբ: Գրյումելը ենթադրում է, որ այն գրվել է 913 թ. հու-
նիս– 914 թ. փետրվար ժամանակային միջակայքում (Юзбашян. 1988, 107):
Նամակի բովանդակությունը, անշուշտ, պատմիչը ենթարկել է մշակման, համա-
պատասխանեցրել երկի ընդհանուր ոճին՝ ստեղծելով ոճային ներդաշնակութ-
յուն (Драсханакертци. 1986, 30):

⁴² Լեո. 1967, 553:

⁴³ Դրասխանակերտցի. 2010, 523:

Բյուզանդիայի կայսրը օգնություն ցույց կտա և նույնիսկ «առաքեսցէ զաւր բազում յաւգնականութիւն», որպէսզի փրկի արեւելյան քրիստոնեութիւնը կորստյան վտանգից:

Ուշագրավ է, որ ոչ ծավալուն նամակում պատրիարքը երկու անգամ շեշտում է Հայոց կաթողիկոսի հոգևոր գերիշխանությունն Այսրկովկասի քրիստոնյաների վրա. «Կարծեմ ոչ ինչ գանխու է, տէ՛ր իմ, ի քոյոյ յաստուածասիրութենէդ յոյժ տրտմութիւն եւ անպակաս ցաւք սրտից մերոց յաղաքս Հայոց եւ Վրաց եւ Աղուանից միահամուռ քոյդ հաւատացեալ հաւտից», իսկ նամակի մեկ այլ հատվածում «Քոյոյդ հաւտիդ Հայոց եւ Վրաց եւ Աղուանից»⁴⁴: Համադրելով կայսրության կողմից հայոց հոգևոր և քաղաքական իշխանության առաջնորդներին բնորոշող տիտղոսները՝ Ա. Նդիազարյանը եզրակացնում է. «Ինչպէս Սմբատ Ա-ն էր Բյուզանդիայի կողմից դիտվում որպէս «բովանդակ Արեւելքի գլխավոր», այնպէս էլ Հայոց կաթողիկոսն էր դիտարկվում որպէս քրիստոնյա Արեւելքի հոգևոր առաջնորդ»⁴⁵: Կայսերական եկեղեցապետի նամակում Հայոց կաթողիկոսի՝ Հայոց, Վրաց և Աղվանից միացյալ հոտի հոգևոր առաջնորդ ճանաչվելու փաստը բացահայտում է նշյալ ժողովուրդների միջև այդ ժամանակ դավանական տարբերությունների բացակայության ուշագրավ իրողությունը: Պարզ է դառնում, որ Բագրատունիներին ենթակա քաղկեդոնիկ վրացիներն այդ ժամանակ դավանական առումով կայսրության հետ շատ կապված չէին⁴⁶:

Նամակում պատրիարքը ակնառու հարգալից և մեծարական վերաբերմունք է ցուցաբերում Հայոց կաթողիկոսի նկատմամբ՝ ասելով, որ Վրաց ու Աբխազաց թագավորներին հորդորել է «լսել խրատուղ ձերոյ (Հովհաննես Դրասխանակերտցու – Վ. Ա.)»: Այս փաստը թույլ է տալիս հասկանալ բյուզանդական իշխանությունների պատկերացումները հայոց հոգևոր առաջնորդի հնարավորությունների մասին, քանզի արաբների դեմ համակովկասյան դաշնակցության ձևավորման գործում Հայոց կաթողիկոսին վերապահում էին համակարգողի դեր: Ցնցումների և հուզումների ժամանակաշրջանում, ինչպէս նկատում է Մաքսուդյանը, շնորհիվ իր բարձր եկեղեցական դիրքի, Հովհաննես Դրասխանակերտցին դառնում է միջազգային մասշտաբի կարևոր քաղաքական կերպար, որի իրավասությունը տարածվում էր ոչ միայն Հայոց, այլև Աղվանքի ու Վրաստանի թագավորների հպատակների վրա⁴⁷:

Ստանալով պատրիարքի նամակը՝ Դրասխանակերտցին առանց հապաղելու ձեռնամուխ է լինում նրա հանձնարարականների կատարմանը: Առաջին հերթին հանդիպում է մեծ փորձառություն և հեղինակություն վայելող Վրաց թագավոր Ատրներսեհին, համոզում նրան կազմել ու գլխավորել «ընդ իշխանս եւ ընդ տեարս աշխարհիս Հայոց եւ Վրաց» դաշնակցությունը: Աբխազաց Գուրգեն թագավորը նույնպէս միանում է այս ձեռնարկին: Կաթողիկոսի համար դյուրին չէր վերադառնալ Հայաստան, քանի դեռ Յուսուֆը, ով «կոխեաց

⁴⁴ Դ ր ա ս խ ա ն ա կ ե ր տ ց ի. 2010, 522:

⁴⁵ Ե դ ի ա զ ա ր յ ա ն. 2016, 41:

⁴⁶ Այս կապակցությամբ Մ. Օրմանյանը գրում է. «Վրաց կանուխէն քաղկեդոնականութեան յարիլը՝ ոյժը կորուսած էր Հայ Բագրատունիներուն այն կողմերուն իշխանութիւնը ձեռք անցրնելէն ետքը» (Օ ր մ ա ն ե ա ն. 2001, 1220):

⁴⁷ Drasxanakertci. 1987, 1.

զարբուժվենա Տեառն ղեռեւս արձանացեալ նստէր ի մայրաքաղաքն Դվին. եւ մոմոեալ անհնարին դառնութեամբ, շրջէր, խնդրէր, հայցէր, թէ զո՞ կանիցէ»⁴⁸: Սակայն զանց առնելով նորից բանտարկվելու իրական սպառնալիքը և զարհուրելի բանտային հիշողությունները՝ կաթողիկոսը վերադառնում է Հայաստան: Կաթողիկոսի խնդիրն էր՝ տեղում հանդիպել հայ նախարարներին և ձևավորել միասնական պայքարի ճակատ: Նա հանգրվանում է համեմատաբար ապահով Տարոն գավառում և հյուրընկալվում իր բարեկամ «զմեծ եւ զխոհեմ եւ զհանճարեղ իշխանն Հայոց» Գրիգորին⁴⁹: Երկրի ներքաղաքական անկայունության պատճառով թեև Տարոնում թուլացել էր Բագրատունյաց կենտրոնական իշխանության ազդեցությունը, սակայն Հայոց եկեղեցու և հովվապետի հոգևոր իշխանությունն ամբողջությամբ պահպանվում էր թե՛ տեղի իշխանների և թե՛ ժողովրդի մեջ: Այստեղ մոտիկից շոշափելով հայ հասարակության տարբեր շերտերի տրամադրությունները՝ կաթողիկոսը համոզվում է, որ տեղական ժամանակ ավատատեր իշխանների մասնավոր շահերից ձևավորված հակասությունների բարդ հանգույցը լուծելը դյուրին գործ է: Դա առավել ղեկարանում էր, որովհետև Յուսուֆը հայ նախարարների նոր «որս» էր սկսել: Նրա գլխավոր թիրախը Գագիկ Վասպուրականցին էր, ով վերցնում է «ընտանեաց իւրայոցն եւ զկապուտն զանճարանաց, այլ եւ համագունդ իսկ զամենայն աշխարհակոյտ խառնիճաղանճս տէրութեան իւրոյ»⁵⁰ հեռանում ու պատսպարվում է Մոկքի և Կորդուքի անառիկ լեռներում, որտեղից պաշտպանական կռիվներ է վարում թշնամու դեմ: Նրա եղբայր Գուրգենն ու փեսա Սմբատ Սյունին, ովքեր Սմբատ արքայի նահատակությունից հետո ապաստան էին գտել Գագիկի մոտ, օգնում էին նրան: Շապուհի որդի Աշոտ սպարապետը՝ Աշոտ Բ-ի հորեղբորորդին, անցել էր Յուսուֆի կողմը և գտնվում էր նրա վերահսկողության տակ: Աշոտ Շապուհյանի վիճակը չափազանց բարդ էր. մի կողմից չէր ցանկանում խախտել բարեկամությունն ամիրայի հետ, իսկ մյուս կողմից՝ վնասել իր երկիրը⁵¹: Ինչ վերաբերում է Աշոտ արքային, ապա նա մնում էր հաստատակամ և բոլորին հիացնում էր իր արիությամբ, սխրանքներով՝ ուղղված «ոչ միայն ընդ սառակիճոսացն այլ եւ ընդ Վրաց եւ ընդ Գուգարաց, որք ապիրատս զնմանէ խորհէին»⁵²: Վերլուծելով իշխանական հարաբերությունների բարդ խճանկարը՝ կաթողիկոսը Տարոնում համոզվում է, որ փրկության լավագույն տարբերակը քրիստոնեական մեծ պետության հովանավորության տակ անցնելն է, և «միայն կայսեր յանձն արար զեղս հնարից խաղաղուն»⁵³: Այդ նպատակով Տարոնի Գրիգոր իշխանի

⁴⁸ Դրասխանակերտցի. 2010, 524:

⁴⁹ Դրասխանակերտցի. 2010, 501:

⁵⁰ Դրասխանակերտցի. 2010, 524:

⁵¹ Աղոց. 2012, 196:

⁵² Դրասխանակերտցի. 2010, 525:

⁵³ Չամչյան. 1984, 778: Դրասխանակերտցին Տարոնը դիտում էր մի կամուրջ, դիվանագիտական առաքելության նշանակետ՝ կայսրության հետ ավելի սերտ հաղորդակցվելու գործում, քանի որ այս ժամանակաշրջանում Հայաստանի ոչ մի չընդունված աշխատանքային կապված չէր Բյուզանդիայի հետ, ինչպես Տարոնը (Գրիգորյան. 1983, 136):

խորհրդով⁵⁴ Դրասխանակերտցին 914 թ. նամակ է գրում Բյուզանդիայի Կոստանդին է Միրանաժին կայսրին (913–959)⁵⁵: Այն պատմաբանի գրչին հատուկ պերճախոս ոճով շարադրված փաստաթուղթ է՝ ուղարկված «ի Յովհաննիս է Հայոց Մեծաց նուսատ կաթողիկոսէ»։ Լեոյի բնորոշմամբ՝ «սկզբից մինչև վերջ քաղաքական մի գրություն է»⁵⁶, որտեղ հեղինակը դիվանագիտորեն խուսափում է կրոնական հարցերի արծարծումից՝ «զգուշանալով, որ դաւանական միութեան խնդիր մէջտեղ չելլէ»⁵⁷:

Նամակը սկսվում է Բյուզանդիայի կայսերն ուղղված մեծարանքի երկարաշունչ ողջունազրույթով. «Գերաբուն եւ ինքնակալ կայսր Հռովմայեցւոց, աւգոստոս Կոստանդինոս յԱստուածուստ պսակեալ եւ պերճացեալ, մեծ եւ բարեհաղթ թագաւորք տիեզերաց, աստուածասէրք եւ բարեպաշտք»։ Կաթողիկոսը արժեւորում է իր եկեղեցու դերը, որը թեև ծանր վիճակում է «եւ ի թշնամեաց աստի գերեալ եւ իբրեւ զանապատ անջրդի խաւպանացեալ ըստ նմանութեան մաւր յանգաւակացաւ յորդւոց», սակայն ամուր է ու հավատարիմ իր առաքելութեանը⁵⁸: Գեղեցիկ առաջաբանից հետո նամակագիրը խնդրողի և զանգատվողի վայելուչ, արժանապատվություն արտահայտող ոճով նկարագրում է երկրի ողբերգական վիճակը, որը դարձել է անհավատների ավերիչ ասպատակությունների ու անմիաբան, փառասեր իշխանների գոտությունների թատերաբեմ։ Հիշեցնում է, որ նախկինում, երբ հայերն ապրում էին «ի հովանի թեւոց ինքնակալացոյ», ապահով էին «որպէս ի վայելուչ քաղաքի»։ Հայերի զրկանք-տառապանքների նկարագրութեան համատեքստում կաթողիկոսը, որպես քրիստոնեական առաքինություններին անմնացորդ հավատարմութեան խորհրդանիշ, հիշատակում է նահատակ Սմբատ Ա Բագրատունի արքային՝ «բոլորից արեւելեայցս գլխաւորի, որ հոգեւորապէս արժանացաւ անուանիլ ի ձենը որդի ձեզ՝ ծառայն ձեր, զի առ բարեգործն այն եւ խնամակալն եկեղեցւոյ եւս չարահատոյց քան առ ամենեւեան գտաւ չար թշնամին։ Վասն զի ըստ մեղաց մերոց մատնեցաւ խնամածուն այն հաւտին Քրիստոսի ի մետաղս անզգամին եւ ամբարշտի, եւ վտանգեալ տագնապեալ չարաչար չարչարանաւք զնա, որ ի ծերութիւն պարարտութեան հոգեւոր խաղաղացուցեալ էր զԱւքանազեան ազգս»⁵⁹: Կայսեր քրիստոնեական գուլթը շարժելու համար

⁵⁴ Ա. Դ. ռ. ց. 2012, 197: Այդ մասին վկայություններ կան Կոստանդին Միրանաժին «Կայսրութեան կառավարման մասին» երկասիրութեան «Տարոն երկրի մասին» գլխում (Կոստանդին Միրանաժին. 1970, 4–5):

⁵⁵ Մ. Չամչյանի կարծիքով՝ նամակը գրվել է 920 թ. նոյեմբերին (Չամչյան. 1984, 778):

⁵⁶ Լ. Ե. ռ. 1967, 554:

⁵⁷ Օրմանեան. 2001, 1222: Պատմիչի նամակը Մ. Չամչյանը դիտել է որպես նրա քաղկեդոնական տրամադրությունների արտահայտություն (Չամչյան. 1984, 778–781): Ֆրանսիացի արևելագետ էժեն Բորեի գնահատականով՝ Դրասխանակերտցին պատճառ է եղել «հերձվածողութեան մեջ հայերի թաղված մնալուն»։ «Հերձվածողութեան» հասկացության տակ նա նկատի ունի հակաքաղկեդոնականությունը, հետևաբար, Դրասխանակերտցուն «մեղադրում է» հակաքաղկեդոնականության մեջ (Բախչիյան. 1976, 125–126, ծանոթ. 10):

⁵⁸ Դրասխանակերտցի. 2010, 525:

⁵⁹ Դրասխանակերտցի. 2010, 528:

ներկայացնում է եկեղեցու անմխիթար վիճակը, որը «խոսքանացեալ եղեւ եւ իբր այրութեամբ իմն անխնամ եւ անհոգացող մնացեալ եւ լռեալ ի տաւնից տարեկանաց», իսկ հավատացյալ հոտը՝ «գրկեալք ի հայրենի աւժանդակեն եւ ի սեպհական վերակցութեն»։ Նկարագրում է արաբական գերության և հետգերության շրջանի իր ողբասկանն ու խնդրում կայսրին. «Փրկեսջիք զվիճակ ժառանգութեան ձերոյ», իսկ Հայաստանից արաբներին հալածելուց հետո՝ «նուաճեսջիք զկողմանս զայսոսիկ զոր ստացայք ի սկզբանէ ի ձեռն քաղցր աւրինաց ձերոց»⁶⁰:

Կայսրության նկատմամբ ցուցաբերած համակրական զգացումներում կաթողիկոսն անկեղծանում է՝ ասելով, որ իր վաղեմի երազանքն է եղել կայսրին հանդիպել գահանիստ քաղաքում, սակայն տարբեր պատճառներով չարունակաբար հետաձգվել է։ Նա չի թաքցնում, որ ցանկանում է հաստատվել ու գործել կայսերական իշխանության հովանավորության ներքո։ Պատրաստակամություն է հայտնում կաթողիկոսի նստավայրը տեղափոխել Բյուզանդական իշխանության տարածք, որովհետև հայոց հայրապետերը «ի սկզբան հաւատոյս ի հովանի թեւոց ի նախնեաց ձերոց ունէին զբնակութիւնս»։ Նա վստահ է, որ հավատացյալ հոտը կհետևի իր օրինակին, և շատերը կտեղափոխվեն Բյուզանդիայի սահմաններ, իսկ «որք ոչ գայցէն եւ արտաքս ի գաւթէ հաւտի Տեառն ելանիցեն, այնպիսիքն կրեսցեն դատաստանս ի մէջ՝ ո ոք եւ իցէ»։ Նա պարզապես հուշում է, որ արաբներին վտարելու գնով Հայաստանը պատրաստ է ընդունել Բյուզանդիայի գերիշխանությունը. «Յիսմայելականաց աստի արտաքս գերծեալ եւ ի հովանի թեւոց ձերոց ամրացեալ եւ առկայացեալ, արածեսցուք որ ի մեզ հաւտս է Աստուծոյ։ Եւ աւգնականութեամբ ձերով մածաւ եւ փառաւք եւ շնորհաւք պատրաստեսցուք զՀայաստանայցս ժողովուրդ, կազմեալ նախ Տեառն եւ ապա ձեզ կամաւքն Աստուծոյ»⁶¹։ Նամակը փակվում է կայսրին փառաբանող մեծաշուք մակդիրներով։ Հավանաբար, հեղինակը կայսեր սիրտը շահելու և նրա քրիստոնեական զգացմունքները գործի վերածելու թաքուն հույսեր էր փայփայում։ Խնդրո առարկա նամակը, ինչպես ասվեց, գրվել է 914 թ., որից ոչ շատ ժամանակ անց Աշոտ Բ-ն մեկնել է Կոստանդնուպոլիս և թագադրվել Կոստանդին Ծիրանածին կայսեր արքունիքում։

Կաթողիկոսի նամակում արտահայտված էին քրիստոնյա կայսրությանը նվիրված հոգևոր առաջնորդի գաղափարները։ Երկրի աշխարհիկ տերերը՝ նախարարները, անկասկած, չէին կիսում նրա տեսակետները. նրանք նույնպես համակրում էին կայսրությանը և պատրաստ էին կաթողիկոսի հետ պայքարել ընդհանուր նպատակի համար, սակայն չէին ցանկանում վտանգել իրենց անկախությունը՝ ենթարկվելով կայսրությանը⁶²:

Հայաստանի համար բախտորոշ այս շրջանում հայ-բյուզանդական նամակագրությունը վերահիշյալ գրություններով չի սահմանափակվում։ Մեզ է

⁶⁰ Դրասխանակերտցի. 2010, 530:

⁶¹ Դրասխանակերտցի. 2010, 531:

⁶² Աղոնց. 2012, 198: Խնդրո առարկա նամակը գնահատելով «միջնադարյան հայ դիվանագիտության և նրբամտության մի արտահայտություն»՝ Առաքել Առաքելյանը գտնում է, որ Դրասխանակերտցու քայլը խիզախ էր, բայց՝ ոչ ճիշտ (Առաքելյան. 1959, 460):

Հասել Դրասխանակերտցու և Սմբատ Ա թագավորի հետ Կոստանդնուպոլսի պատրիարք Նիկողայոս Միստիկոսի վարած թղթակցության ևս երկու կարևոր նմուշ՝ 101-րդ և 139-րդ թղթերը: Բարեբախտաբար, պահպանվել են այդ նամակների հունարեն բնագրերը, որոնք թարգմանել և քննել է անվանի հայագետ Հրաչ Բարթիկյանը:

101-րդ թվակիր նամակի հասցեատերը Հայոց կաթողիկոս Հովհ. Դրասխանակերտցին է: Այն գրվել է 915 թ. Աշոտ Բ-ի Կոստանդնուպոլսից բյուզանդական զորքով վերադառնալուց անմիջապես հետո⁶³: Ոչ ծավալուն այս նամակում պատրիարքը հորդորում է Հայոց կաթողիկոսին երախտագիտությամբ գնահատել «աստվածապսակյալ կայսեր բարեգործությունը», և ծառայություններ մատուցելու եղանակով ապացուցել այդ վերաբերմունքին արժանի լինելը⁶⁴: Կայսերական եկեղեցու պետը նամակի հետ նաև պատմուճան է ուղարկում Հայոց կաթողիկոսին: Նամակից երևում է, որ Աշոտ Բ-ն դիմել է Բյուզանդիային՝ իրեն հայոց թագավոր ճանաչելու խնդրանքով, իսկ կայսրությունը հավանություն է տվել նրա խնդրանքին: «Մեծ և աստվածապսակյալ կայսրը, — գրում է Կոստանդնուպոլսի պատրիարքը Հայոց կաթողիկոսին, — ձեր խնդիրքին ուշի ուշով ունկնդիր լինելով, ընդառաջ գնաց և հաստատումն ու պատիվը, որ մեծ ցանկություն ունեցավ ստանալու նա, ում վստահված է ձեր իշխանությունը, տվեց»⁶⁵: Այստեղ ակնարկվում է Աշոտ Բ-ի գահ բարձրանալը և ճանաչվելը բյուզանդական արքունիքի կողմից: Նաև ենթադրվում է, որ Աշոտ Բ-ն Բյուզանդիային դիմել է արաբների դեմ ազատագրական պայքարում օգնելու խնդրանքով:

139-րդ նամակն ուղղված է Հայոց «իշխանաց իշխանին», որի տակ հասկացվում է Հայոց թագավորը: Նամակի սկզբում հույն պատրիարքը երկաբանակությունը համարում է «ավելի լավ» դավանանք, իսկ հայոց միաբանակությունը քողարկված անվանում է «հին չարափառություն»: Հակիրճ գաղափարական գրոհից հետո խոսվում է կյանքից նոր հեռացած կաթողիկոսի փոխարեն ապագա կաթողիկոսի ձեռնադրությունը Կոստանդնուպոլսի եկեղեցում կատարելու՝ Հայոց թագավորի խնդրանքի մասին: Սրան ի պատասխան՝ պատրիարքը գրում է. «Քեզ մնում է այստեղ ուղարկես Աստուծո համաձայնությունամբ (առաջադրվելիք) ձեր ապագա քահանայապետին, որպեսզի (նա) ստանա բարեպաշտության առավել ճշգրիտ դավանանքը, լինելով մեզ հետ ինչքան ժամանակ որ նա ցանկանա, ծանոթանա բարեպաշտության հարցերին և եկեղեցական իրավիճակին, որից հետո, արժանանալով ձեռնադրության, վերադառնա ձեր պայծառափայլ ազնվությունը, ձեր իշխանության լիությունը»⁶⁶: Ենթադրելի է, որ նոր մահացած կաթողիկոսը պետք է լինի Հովհ. Դրասխանակերտցին: Սակայն վերջինս կյանքին հրաժեշտ է տվել քիչ ավելի ուշ, քան

⁶³ Բ ա ռ թ ի կ յ ա ն. 1966, 252: Ա. Եղիազարյանը գտնում է, որ նամակը գրվել է Աշոտ Բ-ի Կոստանդնուպոլսում եղած ժամանակ (Ե ղ ի ա զ ա ռ յ ա ն. 2016, 43):

⁶⁴ Բ ա ռ թ ի կ յ ա ն. 1966, 255:

⁶⁵ Բ ա ռ թ ի կ յ ա ն. 1966, 252:

⁶⁶ Բ ա ռ թ ի կ յ ա ն. 1966, 256: Նամակում հիշատակվում է Կոստանդնուպոլսի նշանավոր պատրիարք Փոտը (858–867), (877–886), որը հայ-բյուզանդական եկեղեցական միությունն ստեղծելու համար մեծ ջանքեր է գործադրել, սակայն էական հաջողության չի հասել:

Հուլյն պատրիարք Միստիկոսը. Հետևաբար, վերջինս չէր կարող խոսել Դրասխանակերտցու մահվան մասին:

Նամակի բովանդակությունից երևում է, որ Հայաստանը դժվարին դրություն մեջ է: Այլապես Հայոց արքան երբեք չէր համաձայնի, թեկուզ առերես, որ Հայոց կաթողիկոսն օծվի Կոստանդնուպոլսում երկաթնակ պատրիարքի ձեռքով: Հայաստանի վրա գերիշխանություն հաստատելու հույսեր Բյուզանդիային ներշնչել էին և՛ Հայոց թագավորը, և՛ Հայոց կաթողիկոսը, ով վերոնշյալ իր նամակում մի քանի անգամ ակնարկում է Բյուզանդիայի տիրապետությունն ընդունելու ցանկալիությունը: Հայաստանը դժվարին վիճակից դուրս բերելու և օգնության ակնկալիքով Սմբատ Ա-ն ու կաթողիկոսը, իհարկե, ստիպված էին այդպես դիմել կայսրությանը: Ամենայն հավանականությամբ, նման նամակ գրել է նաև Հայոց Սմբատ Ա արքան 909–910 թվականներին, երբ Յուսուֆ ամիրան կողոպուտի ու ավերի էր մատնել Հայաստանը, իսկ կաթողիկոս Դրասխանակերտցին բանտարկված էր: Կաթողիկոսի հետ բանտ էին նետվել նաև բազմաթիվ հայ նախարարներ ու իշխաններ, որոնք խոշտանգվում և մահապատժի էին ենթարկվում: Այդպիսի պայմաններում, ըստ երևույթի, Սմբատ արքան հույսը կտրել էր, որ կաթողիկոսը կարող է արաբների ձեռքից ազատվել: «Հովհաննես Դրասխանակերտցու երկարատև բացակայությունը, – գրում է Հ. Բարթիկյանը, – հավանաբար հարց է բարձրացրել նոր կաթողիկոսի ընտրության մասին: Գուցե վերջին հանգամանքը Սմբատ թագավորը ցանկացել է օգտագործել Բյուզանդիայից որևէ օգնություն ստանալու համար, ձևականորեն առաջարկելով Բյուզանդիային, որ նոր կաթողիկոսն օծվի Կոստանդնուպոլսում»⁶⁷: Հետևաբար, ստացվում է, որ Նիկողայոս Միստիկոսի 139-րդ նամակն ուղարկվել է 912–913 թթ.: Հայոց կաթողիկոսի կենդանության օրոք, և ոչ թե Աշոտ Բ-ին, այլ նրա հորը՝ հայոց արքա Սմբատ Ա-ին:

Կաթողիկոսի հաշտարար միջնորդությունը ներիշխանական պայքարում

Հայոց կաթողիկոսի նամակը, որը նաև դիմում-տեղեկանք էր Հայաստանում տիրող դրության մասին, անհրաժեշտ ազդեցություն և արձագանք է ստանում բյուզանդական արքունիքում: Կայսեր հանձնարարությամբ Հայաստանի և Բյուզանդիայի միջև բարեկամությունն ու դաշինքը վերականգնելու դիվանագիտական առաքելությամբ Հայաստան է ուղարկվում հայերենի լավ գիտակ ոմն Վասիլիկոս Թեոդորոս⁶⁸: Մեծ նվերներով Հայաստան ժամանած պատվիրակը պետք է հանդիպեր Աշոտ Բ-ին ու Հովհաննես կաթողիկոսին և նրանց հրավիրեր Կոստանդնուպոլիս: Պատմիչի խոսքով իրենք պետք է չտապեին «երթալ ի միասին, տեսանել եւ տնաւրինել զհասարակացն աւգուտս»⁶⁹: Քանի որ Աշոտ երկաթը գտնվում էր Հայաստանի հյուսիսարևելյան շրջաններում, իսկ Հովհաննես կաթողիկոսը՝ Տարոնում, կայսեր բանազնացն առաջինը հանդիպում է կաթողիկոսին, այնուհետև՝ Աշոտ երկաթին: Վերջինս,

⁶⁷ Բարթիկյան. 1966, 254:

⁶⁸ Васильев. 1902, 216.

⁶⁹ Դրասխանակերտցի. 2010, 533:

առանց ժամանակ կորցնելու, ուղևորվում է Կոստանդնուպոլիս և այնտեղ արժանանում մեծ պատիվների⁷⁰։ Մինչդեռ կաթողիկոսը, հասնելով Դերձան, փոխում է որոշումը և, հակառակ կայսեր բազմակի հրավերներին, հրաժարվում Կոստանդնուպոլիս մեկնելուց։ Նա կասկածներ ուներ, որ այնտեղ իր առջև կրթվեն դավանանքային խնդիրներին վերաբերող պահանջներ, ինչը կարող էր գայթակղել քաղկեդոնականության մեջ իրեն մեղադրել ցանկացող տկարամիտներին։ «Նա զգում էր իր ձեռնարկած քաղաքական գործի անհրաժեշտությունը, — գրում է Լեոն, — բայց նրա ուտներին փաթաթվել էր Քրիստոսի բնության չարաղետ հարցը»⁷¹։ Հովհաննես Պատմաբանը, ով բյուզանդական կայսրին ուղղված նամակում հավաստիացնում էր, թե նրան հանդիպելը տարիների իր երազանքն է և նույնիսկ պատրաստակամ էր իր հոտը դնել նրա տիրապետության տակ, կայսրության ներկայացուցիչների հետ շփումներ ունենալուց հետո հրաժարվում է այցելել մայրաքաղաք։ Նրա վարքագծից երևում է, որ քաղկեդոնականությանը մերձենալու և Հայաստանը Բյուզանդական կայսրությանը ենթարկելու մասին հաղորդած մտքերը պարզապես դիվանագիտական հնարք էին⁷²։ Այնուամենայնիվ, նա «ամսաւրեայ աւուրս» մնում է Դերձանում, ապա՝ անցնում Եկեղյաց գավառ։ Շրջագայելով Գրիգոր Լուսավորչի կյանքով և մահվամբ նվիրագործված սրբավայրերում՝ ապացուցում է իր նվիրվածությունը Հայոց եկեղեցու դավանությանը⁷³։ Կաթողիկոսն այցելում է Սեպուհ լեռան ճգնավորներին՝ Մանյա այր, աղբյուրն ու այգին, կտրում է Սբ. Գրիգորի տնկած ծառի մի ճյուղը և օրհնության հող վերցնում փլուզված բլրակից, որտեղ իր հրամանով «չինեալ էր եկեղեցի նախ քան զայս ...», ի մահարձանաց ինչ կրով ձուլածոյ»։ «Ամիսս իբրեւ ինն» կաթողիկոսն ապրում և շրջագայում է Եկեղյաց գավառի վանքերում՝ սպասելով Աշոտի վերադարձին։ «Ավելի քան հավանական է, որ կաթողիկոսը հրաժարվել է կայսերն այցելելու իր մտադրությունից այդ վանքերի վանականների ազդեցությունից»⁷⁴, — եզրակացնում է Ն. Ադոնցը։ Հովհաննես կաթողիկոսը Դերձան և Եկեղյաց գավառներ էր գնացել այն ժամանակ, երբ Աշոտ Երկաթը մեկնել էր Կոստանդնուպոլիս։ Կաթողիկոսի՝ այդ գավառներում անցկացրած տասնամյայակը համապատասխանում է այն տևողությանը, որն անցկացրել է Աշոտ Երկաթը Կոստանդնուպոլսում։ Ելակետ ընդունելով հույն պատմիչ Թեոփանեսի Շարունակողի վկայությունը՝ կարելի է եզրակացնել, որ Աշոտ Երկաթի

⁷⁰ Ասողիկը և Ստ. Օրբելյանն Աշոտ Երկաթի այցը Կոստանդնուպոլիս ներկայացնում են որպես փախուստ (Ասողիկ. 2010, 748, Ստեփանյան Սիւնեացեպիսկոպոսի. 1861, 140)։

⁷¹ Լեոն. 1967, 555։

⁷² Հայոց պատմություն. 2014, 42։

⁷³ Բախչինյան. 1973, 44։

⁷⁴ Ադոնց. 2012, 199։ Գնել Գրիգորյանը կարծում է, որ կաթողիկոսի՝ Բյուզանդիա մեկնելուց հրաժարվելը կարելի է վերագրել Տարոնի Գրիգոր իշխանին (Գրիգորյան. 1983, 136, ծանոթ. 93)։ Վ. Վարդանյանի կարծիքով Բյուզանդիա չմեկնելու կաթողիկոսի որոշումն ընդունվել է Աշոտ Շապուհյանի և Գագիկ Արծրունու ազդեցությամբ, քանի որ այդ ուղևորությունն ավելի կմտերմացներ կաթողիկոսին իրենց հակառակորդ Աշոտ Երկաթի հետ (Վարդանյան. 1988, 123)։

այցը Կոստանդնուպոլիս տեղի է ունեցել 915 թվականին⁷⁵։ Այս հարցում կարևոր նշանակություն ունեն նաև Դրասխանակերտցուն հղած Կոստանդնուպոլիս պատրիարք Նիկողայոս Մխատիկոսի իրարահաջորդ նամակները, որոնք թվագրվում են 915 թվականով⁷⁶։ Այստեղ կարևոր է նաև մատենագրի այն տեղեկությունը, որ Հայաստանում Յուսուֆի հարձակումներով սկսված «անողորմ պատերազմացն» ժամանակաշրջանը տևում է «յեթաւն ամ»։ Քանի որ Յուսուֆի հարձակումները սկսվել են 909 թ., հետևաբար, դրանց ավարտը համապատասխանում է 915–916 թթ.⁷⁷։ Հիմք ընդունելով վերոնշյալ ժամանակագրական տվյալները՝ կարելի է եզրակացնել, որ Դրասխանակերտցին Դերջանում և Եկեղյաց գավառում անցկացրել է տասն ամիս՝ 915–916 թթ.։

Նախքան Կոստանդնուպոլիսից Աշոտ Բ-ի վերառանալը կաթողիկոսը մեկնում է Այրարատ, քանի որ երկրում դրությունը դեռևս չարունակում էր մնալ լարված, նույնիսկ նա խոստովանում է՝ կցանկանար «տարաբնակ լինել ի բնակութենէ աստի, եւ առ նոյն սուրբ այրի (Սեպուհ լեռան Մայա այրք քարայր – Վ. Ա.) բնակիլ»⁷⁸։ Իր ժառանգական իշխանությունը տիրելու համար Աշոտ Երկաթը 916 թ. կայսեր նվիրած թանկարժեք գանձերով և «բազում զաւրավարս եւ զաւրս Հռովմայեցիս ... եկեալ հասեալ յաշխարհ իւր»։ Նա արդեն տեղյակ էր Հայաստանում տիրող դժվարին դրության և Յուսուֆի գործած մեքենայությունների մասին։ Նորընծա արքան հարկադրված էր պայքարել թե՛ ներքին, թե՛ արտաքին ուժերի դեմ։ Երկրում երկպառակությունները խորացնելու և Բագրատունի արքայազուններին իրար հակադրելու համար 916 թ. Յուսուֆը «նանրական մտաւք թագ կապեալ սպարապետին Հայոց (Աշոտ Շապուհյանին – Վ. Ա.) եւ սուսեր ընդ մէջ ածեալ» ուղարկում է Հայաստան⁷⁹։ Բյուզանդիայից վերադարձած արքայի դեմ ընդվզում է «մեծ դաստակերտն Կողբ», որը պատկանում էր Աշոտ սպարապետին։ Ուստի և Աշոտ Բ-ն իրեն ուղեկցող բյուզանդական զորքով այն ավերում ու «ի գերութիւն յունականացն զնոսա մատնէր»⁸⁰։ Աշոտ Շապուհյանը, տեսնելով, որ «սիրելի դաստակերտն իւր վանեալ վարատեալ եւ գերեալ յարքայորդւոյն Աշոտոյ եւ ի Հռովմայական զաւրացն, եւ զայս եւս զգերդաստանս նորա եւ զգեաւղս յաւարի առեալ», պատրաստվում է պատերազմել Աշոտ Երկաթի դեմ։ Նրանք իրար դեմ դուրս են գալիս «իբրեւ զաւտարածին թշնամիս ընդ միմեանս ի գրգռութիւն մարտից մարտուցեալ»⁸¹։ Սպասվում էին եղբայրասպան կոճիվներ անկանխատեսելի հետևանքներով, սակայն կաթողիկոսին հաջողվում է կան-

⁷⁵ Թեոփանեսի շարունակող. 1990, 228, 368, ծանոթ. 114:

⁷⁶ Բարթիկյան. 1966, 252, Եղիազարյան. 2016, 42–43:

⁷⁷ Ադոնց. 2012, 201, Եղիազարյան. 2016, 42–46:

⁷⁸ Դրասխանակերտցի. 2010, 535:

⁷⁹ Դրասխանակերտցի. 2010, 538: Ըստ սկզբնաղբյուրի՝ Աշոտ Շապուհյանը «թագավորել» է 18 տարի. «զԱշոտ, որդի Շապուհոյ, եղբոր Սմբատայ, կացուցանէ (Յուսուֆը) ի տեղով Սմբատայ, որ թագաւորեաց Հայոց ամս ԺԸ (18)» (Մանր ժամանակագրություններ, XIII–XVIII դդ. 1956, 501):

⁸⁰ Աշոտ Բ-ն բյուզանդական զորքով Դվին չի մտել։ Բյուզանդական զորքը Կողբի շրջակայքը ավարտելով և գերիներ վերցնելով, ետ է վերադարձել (Դանիելյան. 1977, 76):

⁸¹ Դրասխանակերտցի. 2010, 538:

խել արյունալի բախումները: Բագրատունի ժառանգների միջև ծագած վեճը նրա միջամտությամբ հարթվում է և համաձայնություն ձեռք բերվում: «Իսկ իմ ապա ըստ դիպաց ինչ ի ժամ դիպաւ,— պատմում է իր միջնորդության արդյունքներից գոհ կաթողիկոսը,— ժամանեալ, եկեալ, հասեալ ի հեռաստանէ հալածանացն եւ տարուբերեալ եւ համոզեալ ի մէջ նոցա՝ զվայելուչ եղբայրական լծակցութիւն պատրաստել ի մէջ նոցա ջանահնար լինէի: Ըստ որում ապա յունկնդրութիւն ինձ եկեալք երկաքանչիւրքն եւ հաւանական միտս ստացեալ, ի պայման միաբանական եւ խաղաղաւետ սիրոյ հաստատեցի նոցա»⁸²: Հիշյալ դեպքերից հետո Աշոտ Բ-ն հաստատվում է Վաղարշապատում, իսկ սպարապետը՝ Դվինում: Սակայն Աշոտ Շապուհյանի հավատարմությունը երկար չի տևում: Աշոտ Բ-ն լսում է, որ հորեղբոր որդին հավատարիմ չի մնացել «սահմանեալ ուխտին» և հափշտակել է Վաղարշապատի շուրջ գտնվող մի քանի կալվածներ, որոնք պատկանում էին իրեն: Արքան հանկարծակի հարձակվում է Աշոտ Շապուհյանի վրա, որն այդ ժամանակ ոչինչ չկատկածելով գտնվում էր «ի գիւղն որ Վաղաւերն անուանի»: Աշոտ Բ-ն սաստիկ ջարդ է տալիս և փախուստի մատնում սպարապետի զորքին՝ ետ խլելով «գամենայն կապուտ կողոպուտ նոցա եւ զգէնս եւ զգարդս եւ զձիս եւ զջորիս բազում յոյժ»⁸³: Կաթողիկոսը ցավով խոստովանում է, որ այս անգամ նրանց հաշտեցնելու իր ջանքերն արդյունք չեն տալիս. «Իսկ ես ապա ժամանեալ անդ՝ ի մէջ նոցա, ոչ սակաւ ինչ բանս յանդիմանութեան եւ լուստացաւ ապառում խոտվութիւն ի վերայ արքայորդւոյն ածէի արտաւարաթոր տոչորմամբ՝ սակս այնպիսի մահահոտ դրժողութեանցն զոր արար: Եւ թէպէտ բողոք բարձեալ ջանահնար լինէի բառնալ ի միջոյ նոցա զչար սերմանացանի որոմնն, զի մի՛ գտցի ի նոսա խմորք ցաւոց, որ թէեւ առ ժամայն տեղի տուեալ բանին հաւանական անուցանէին կամս ի հաշտութեան սակի, սակայն ո՛չ կացեալ մնացեալ ի բանսն բարեզգեացս, այլ վաղվաղակի ի չար մախանս դարձեալ հակամիտէին, եւ այնպէս տակաւին ընդ միմեանս դատէին կշտամբութեամբ չարի եւ բորբոքեալ նախանձու»⁸⁴: Ավատատիրության դարաշրջանին բնորոշ երկպառակհական կռիվները շարունակվում են երկու տարի՝ 917–919 թթ.: Ընդհարումները չէին դադարում, իսկ երկիրը մեծ վնասներ էր կրում. «Առ հասարակ դղրդեալ, սասանեալ, աւերեալ, քանդեալ, կործանեալ լինէր սեպհական տերութիւն աշխարհին իւրեանց. եւ զմեծութիւն եւ զփառս իւրեանց ազգի աւտարի տուեալ, ի փարթամութիւն այլոց եւ յաղքատութիւն ինքեանց տարածեցին զճանապարհս իւրեանց»⁸⁴: Աշոտ Երկաթն ամուսնանում է Աղվանից Սահակ Սևադա անունով «քաջ և հռչակված» իշխանի դստեր հետ: Աներոջից օգնական զորք վերցնելով՝ Աշոտը նորից արշավում է հորեղբոր որդու դեմ, վերսկսում պատերազմը: Կաթողիկոսը դարձյալ միջամտում է, փորձում է հաշտեցնել. «Իսկ ես ի խաղաղութիւն միշտ խաւսէի ընդ երկաքանչիւրսն որպէս միանգամ եւ երկիցս եւ երկուս»⁸⁵: Բայց թագավորը չի լսում կաթողիկոսի հորդորները և առաջնորդվում է «ըստ զրգուլթեան յուզմանն» իր աներձագ Գրիգոր Սևադայի: Պարտություն կրելով՝ Աշոտ Շապուհյանից՝ արքայորդին

⁸² Դ ր ա ս ի ա ն ա կ ե Ր տ ց ի. 2010, 539:

⁸³ Դ ր ա ս ի ա ն ա կ ե Ր տ ց ի. 2010, 541:

⁸⁴ Դ ր ա ս ի ա ն ա կ ե Ր տ ց ի. 2010, 541–542:

օգնությունն է ստանում Գուգարաց իշխան Գուրգենից և վերսկսում հարձակումը: Այստեղ էր, որ Հովհաննես կաթողիկոսին հաջողվում է նորից հաշտեցնել արյունակից ախոյաններին, վերջ տալ եղբայրասպան կռիվներին: Ձեռք բերված հաշտությանից բավարարված՝ կաթողիկոսն արձանագրում է. «Եւ յայնմ նուագի ապա ոչ տուաւ նոցա առ ի յինէն թոյլ մարտիւ ընդ միմեանս հարկանիլ, այլ բաղխեալ իմ զգործարանս իմաստից նոցա, խրատու բարւոյ զունկն մատուցանէին, յաւգտութիւն սիրոյ ընդ միմեանս իմաստութեամբ բերեալք»⁸⁵:

Աշոտ Բ-ն իր աներ Սահակի օգնությամբ ձերբակալում և կուրացնում է իր դեմ ապստամբած Ուտիքի իշխան Մովսեսին: Փոխադարձ անվստահության ու կասկածանքի միջնորդություն նրա դեմ դավադրություն են պատրաստում Գուգարքի Գուրգեն իշխանը և իր եղբայր Աբասը: Կաթողիկոսը չի մեկնաբանում այս ոճրամիտ նախաձեռնության պատճառները: Լեոն իրավացիորեն պնդում է՝ պատճառն իշխանությանը տիրանալն էր, մանավանդ որ Աշոտ Շապուհյանը կարող էր գործել իր աներ Գուգարաց Գուրգեն իշխանի դրդմամբ⁸⁶: Գեղարքունիքի իշխան Վասակը՝ Աշոտ Բ-ի Մարիամ հորաքրոջ որդին, կասկած ունենալով արքայի կողմից իր կյանքի ապահովության համար, նրան այցելելիս երդման թուղթ է խնդրում: Կաթողիկոսի միջնորդությամբ թագավորը երդման գիր է տալիս՝ երաշխավորելով նրա անվտանգությունը: Սակայն Աշոտ Բ-ին տեղեկություն է հասնում, թե սուրհանդակի մոտ բռնվել է Վասակի գրագրությունն Աշոտ Շապուհյանի հետ: Սա բավական է լինում, որ արքան դժի իր խոսքն ու կալանավորի Վասակ իշխանին, «կապէ զնա երկաթի կապանաւք եւ դնէ յամրոցի անդ, որ Կայեանն կոչի»: Դրասխանակերտցին համարում է նաև այստեղ, խիստ հանդիմանություններ է կարդում նրան ուխտադրության համար. «Իսկ ես թէպէտ եւ սաստկագոյն բան յանդիմանութեան ի վերայ ամեալ թագաւորին, պաշարեցի զնա կշտամբութեամբ մեծաւ վասն ստեղծյ ուխտին երդման եւ կապելոյ զՎասակն, եւ ընդ իւրով ձեռամբ զտերութիւն նորայ նուաճելոյ»⁸⁷: Կաթողիկոսի հորդորներով Աշոտը խոստանում է՝ որոշ ժամանակից հետո ազատ արձակել կալանավորին, ինչպես նաև նրա նկատմամբ պատժամիջոցներ չկիրառել:

Շուտով գժտվում են Աշոտ Երկաթը և իր աներ Սահակ Սևադան: Հակառակորդները բանակում են Ախայանք գյուղի մոտ, սակայն, լսելով հայ նախարարների հանդիմանություններն ու հորդորները՝ նրանք «դաշինս հաստատեն խաղաղութեան»: Բազում երդմնագրեր կնքելով՝ «տան իրերաց Քրիստոսադիր կիտիւն եւ միջնորդութեամբ սրբոյ նշանի խաչին»: Սակայն Հայոց արքան կասկածում է, որ Աշոտ Շապուհյանի և Սահակ Սևադայի միջև գոյություն ունի համախոհություն, ուստի հարվածում է Դվինին: Այդ ընթացքում Սահակ Սևադան արչավում է Աշոտ Բ-ի տիրույթների վրա և Կայան բերդին տիրանալով՝ ազատ է արձակում Վասակ Սյունուն: Աշոտ Երկաթը՝ թշնամության պատճառը պարզելու համար, եպիսկոպոսներից մեկին, որպես բանազնաց, ուղարկում է Սահակ Սևադայի մոտ: Վերջինս, անտեսելով եպիս-

⁸⁵ Դրասխանակերտցի. 2010, 542–543:

⁸⁶ Լեո. 1967, 559:

⁸⁷ Դրասխանակերտցի. 2010, 545:

կոպուսի առաքելությունը, վերադառնալով պատերազմ է սկսում: Պատմիչի խոսքերով Աշոտ Երկաթը, Սահակ Սևադայի հետ կնքած հաշտության գիրը կապելով իր առջևից տարվող խաչին, հայտարարում է, որ «Թող Աստված իրավադատ լինի»: Եթե ինքն է մեղավոր, թող վնասվի, եթե Սահակ Սևադան՝ թող պատժվի: Աշոտը պարտության է մատնում հակառակորդին, իսկ Սահակ Սևադային և նրա որդի Գրիգորին ձերբակալելով՝ «կուրացուցանել զաչս երկոցունց նոցա»: Նա գրավում է Գարդմանի բերդն ու այն իր սեփականություն հայտարարում: Կաթողիկոսն Աշոտ Բ-ին մեղադրում է համընդհանուր անվատահոլության միջոցառման ստեղծման մեջ: Նրան դուր չի գալիս, որ Հայոց թագավորն իրեն շահնշահ, այսինքն՝ արքայից արքա է կոչում, իրեն բարձր է դասում երկրի մյուս թագավորներից: Աշոտ Բ-ին հորջորջում է «անվանեալ» կամ «Շահանշահ կոչեցեալ»՝ կամենալով շեշտել, որ այդ տիտղոսով նրան կոչել են ուրիշները, և այն շնորհել է արաբ ամիրա Սբուքը: «Ըստ երևույթին կաթողիկոսը չի ճանաչել շահնշահի նրա իրավունքները, — գրում է Վ. Վարդանյանը, — թերևս նաև չհակադրվելու համար Գագիկ Արծրունու՝ ամենայն հայոց թագավոր դառնալու նկրտումներին»⁸⁸: Եվ, ընդհակառակը, համակրանք է դրսևորում Գագիկ Արծրունու նկատմամբ, որին նախկինում անվանում էր «թագակերպեալ» կամ «թագաւորեցեալ»: Վերջինս Մուքթադիր խալիֆի (908–932) կողմից ճանաչվել էր Հայոց թագավոր, որին ի պատասխան՝ Յուսուֆն արքայական թագ էր ուղարկել Աշոտ Երկաթին:

919 թ. «յետ սակաւ աւուրց» Յուսուֆի բանտարկությունից, Ատրպատականի նոր ոստիկան է նշանակվում Սբուքը: Վերջինս իր իշխանությունն ամրապնդելու համար նույն թվականին Աշոտ Երկաթին շնորհում է Շահնշահի տիտղոս⁸⁹: Այդ կերպ՝ Աբբասյանները ձգտում էին վերջ դնել այն խառնաշփոթ վիճակին, որը քայքայում էր ոչ միայն Հայոց թագավորությունը, այլև վնաս էր հասցնում հենց Արաբական խալիֆայությանը: Բյուզանդական կայսրության հետ գտնվելով անգիջում պայքարի մեջ՝ արաբները ստիպված էին կայունություն հաստատել Հայոց թագավորությունում և նախապատվությունը տալ օրինավոր գահաժառանգ Աշոտ Բ-ին⁹⁰: Շահնշահ պատվավոր տիտղոսը ստանալուց հետո Աշոտը շարունակում է հաղթանակները և չի դադարեցնում երկրի սահմաններն ընդլայնելու իր պայքարը: «Եւ այնուհետեւ ապա հիւսիսական ազգքն, — հավատացնում է պատմաբան կաթողիկոսը, — այնուքիկ ընդ ձեռամբ նորա նուաճեալ հնազանդէին ի ծառայութիւն, եւ ըստ

⁸⁸ Վ ա Ր Գ ա ն յ ա ն. 1988, 121:

⁸⁹ Ասողիկի վկայությամբ, երբ Աշոտ Երկաթը Հայաստանը մաքրեց թշնամուց, նա «գտանէ զծառայս հաւր իւրոյ թագաւորեալ. զինքն անուանեաց Շահանշահ, այսինքն թագաւորաց թագաւոր» (Ա ս ո ղ ի կ. 2010, 748): Վարդան վարդապետը հայտնում է, որ «զծառայս»-ը վերաբերում է Աշոտ Երկաթի հորեղբորորդի Աշոտին, Գագիկ Արծրունուն և Ատրնեբսեհ Բագրատունուն: Աշոտը «կոչեցաւ ի վերայ նոցա Շահանշահ» (Հաւաքումն պատմութեան Վարդանայ վարդապետի. 1862, 87):

⁹⁰ Այս չրջանում Հայաստանի առաջնորդությունը հավակնում էին երեք «Հայոց թագավոր»-ներ՝ Աշոտ Երկաթը, Գագիկ Արծրունին և Աշոտ Շապուհյանը (Ե ղ ի ա - զ ա Ր Գ ա ն. 2016, 48, 50):

աջողակ այցելությունն Աստուծոյ երթալով երթալը եւ զաւրանայր»⁹¹: Դիլինից ոչ հեռու գտնվող Կոտայք գավառից շահնշահը հրովարտակ է ուղարկում Աշոտ Շապուհյանին խաղաղության և հաշտության առաջարկով: Շահնշահը հատուկ գրություն կաթողիկոսին ուղարկում է Շապուհյանի մոտ՝ նախապատրաստելու «ի մէջ նոցա զքաջալայելուչ խաղաղութեանն պայման»: Շնորհիվ իր հեղինակության Հովհաննես կաթողիկոսը համոզում է նրան միասին գնալ շահնշահի մոտ: «Եւ անդ ապա իմով թելադրութեամբ եւ բանի խրատու,— գոհունակութեամբ արձանագրում է կաթողիկոսը,— որ ղեմեալ ի լսելիս լսողացն հանգչիւր, զպաշարումն մառախլապատ, միգապատ ափշութեան մտաց չարին յանձանց ի բաց մերկացեալ, ամենայն իրաւք յարակցէին յինքեանս զկատարեալ խաղաղութեանն դաշինս առհաւատչեայ երդմամբ զնոյն հաստատել»⁹²: Հակաթու թագավորների հակամարտությունն ավարտվում է բարեկամության հաստատումով, որի առթիվ Դիլինում տեղի են ունենում «խնճոյս ցնծութեան»:

Դիլինն այդ ժամանակ դարձել էր Հայոց թագավորությանը ենթակա, և թագավորը հնազանդեցնում է քաղաքում իշխող դիրք ունեցող իսլամ հոգևորականներին: Վերջիններս բռնագրավել էին հայրապետանոցի ինչքն ու կալվածները, որոնց համար պայքարում էր Հայոց կաթողիկոսը⁹³:

Ներքին ընդդիմության դեմ Աշոտ շահնշահի պայքարի վերջին դրվագը Յիլի Ամրամի հետ բախումներն էին, որից հետո նա այլևս հաղթանակներ չի տանում: Կաթողիկոսն առիթը բաց չի թողնում մեղադրելու Աշոտ երկաթին՝ ասելով, որ դրա պատճառը նրա փոխված բնավորությունն է. «Թուի ինձ եթէ գողջտհոսութիւնն զայն, զոր նախն էր ստացեալ, յանմաքուր բղջախոհութիւն փոխարկեալ եւ զքաղցրութիւն պաշտամանն Աստուծոյ յանձնէ ի բաց վարատեալ»⁹⁴: Քաղաքական իմաստությունը օժտված կաթողիկոսը հասկանում էր, որ ջանքերը պետք է ուղղված լինեն իշխանների միասնության ամրապնդմանը և ոչ թե նրանց կործանմանը, քանի որ դարեր շարունակ Հայաստանի քաղաքական ու հասարակական կյանքի հիմքը կազմող ավատատիրական վարչակարգն այնքան խոր արմատներ ուներ, որ դրա դեմ ցանկացած ոտնձգություն ի սկզբանե դատապարտված էր անհաջողության:

Եկեղեցական տիրույթներն ու ունեցվածքը փրկելու Հայոց կաթողիկոսի ջանքերը

922 թ. մայիսի 1–923 թ. ապրիլի 20, Յուսուֆն ազատ է արձակվում և Նասր ալ-Սուլթուքիին նշանակում Հայաստանի նոր ոստիկան⁹⁵: Հայ ժողովրդի բոլոր խավերը՝ թե՛ աշխարհիկ, թե՛ հոգևոր, ենթակա էին նոր ու դաժան հարստահարությունների, քանզի Յուսուֆի բացակայության ժամանակ գանձարանը դատարկվել էր⁹⁶: Այն անհրաժեշտ էր նորից լցնել՝ չխորչելով ապօրինի հարկեր գանձելուց և անմարդկային կեղեքումներից: Նասրը ձերբակալում

⁹¹ Դրասխանակերտցի. 2010, 553:

⁹² Դրասխանակերտցի. 2010, 554:

⁹³ Տեր-Ղևոնդյան. 1965, 135, Հայ ժողովրդի պատմություն. 1976, 62:

⁹⁴ Դրասխանակերտցի. 2010, 556–557:

⁹⁵ Իբն ալ-Ասիր. 1981, 174:

⁹⁶ Լեո. 1967, 567:

է Նախիջևանում իրեն ընծաներով ներկայացած Բաբկեն Սյունուն, ով կամենում էր տիրել Սիսականի իշխանությանը, և Սահակ Սյունուն: Նրանց բանտարկում է Դվինում՝ պահանջելով մեծ փրկագին: Գեղարդավանքում կամ Այրիվանքում լսելով Նասրի հալածանքների և կաթողիկոսանիստ եկեղեցունկատմամբ կատարված ոտնձգությունների մասին՝ կաթողիկոսը ծանր ապրումներով խույս է տալիս նրանից: Տեղի միաբանները համոզում են հայրապետին հեռանալ ավելի ապահով վայր, քանի որ նրա ձերբակալությամբ Նասրը մեծ փրկագին կպահանջեր և անպատիժ կթալաներ հայրապետանոցի հարստությունները: Ստեղծված ընդհանուր ահաբեկման մթնոլորտում կաթողիկոսը հետևում է հոգևորականների հորդորներին և հեռանում դեպի լեռնային վայրեր՝ ստիպված լքելով եկեղեցու ունեցվածքը՝ «ի բաց զինչսն եւ զստացուածսն եւ զպաճար անասնոց», որոնք «կամաւորաբար տացուք յընծայումն հազարացւոյն Նսրայ»: Այնուհետև իջնում է Գեղամա լճի ափերը և կանգ առնում Սևանա կղզում: Անմխիթար վիճակում էր հայտնվել կղզու կուսակրոն ճգնափորների մենաստանը՝ զրկվելով «ի բոլոր ստացուածոց՝ ասնոց եւ անասնոց եւ միայն զփրկութիւն անձանց հոգացեալ»:

Որպեսզի հայրապետական տիրույթներից հեռանալը չորակվի վախկոտություն, կաթողիկոսը բացատրում է իր արարքի դրդապատճառները. «Այլ ես աստանաւր ոչ եթէ յառժամանակեայ ի մահուանէ ինչ պակուցեալ խուսափեցի, այլ ի մտի եղեալ զանհնարին մոլեգնութիւն հեթանոսական մոլորութեանն, զի մի թերեւս թաքուցեալ հաղբք դիւախրոխտք պատրանաց նորա անկցի զմանկամբք եկեղեցւոյ, կամ թէ խառնումն ինչ շփոթից ընդ անարգութիւնս հեթանոսացն մեզ բերցի, որ արտաքոյ է բոլոր կրթական քաջողութեան»⁹⁷: Քիչ անց, երբ զգացմունքները տեղի են տալիս ողջամտությամբ, նա մտածում է՝ չի կարելի բռնավորի կամքին թողնել կաթողիկոսարանը⁹⁸, ու որոշում է նորից վերադառնալ «մերձ ի հայրապետանոց եկեղեցին սուրբ» և փրկել սրբարանները պղծումից: Տեղափոխվում է Արագածի լանջերին գտնվող իր գնած կաթողիկոսական կալվածքը՝ Բյուրական «ամրոցիկը» և այնտեղից անմիջապես բանակցություններ սկսում Նասրի հետ: Դվինի կաթողիկոսարանում բնակվելու թույլտվության դիմաց Դրասխանակերտցին Նասրին խոստանում է «ըստ ձեռին բաւականի միշտ անդանդաղ եղէց զընծայս բարաւրութեանս առաքել» որպես տուրք: Արաբ ամիրան համաձայնություն է տալիս և նույնիսկ «յետկար երդման գրէ»: Գոհունակությամբ ընդունելով Նասրի երդմնագիրը՝ կաթողիկոսը մտածում է, որ վերջապես ապահովություն կտիրի «ի դրունս մերոցն սրբարանաց»⁹⁹: Բայց Դվինի իսլամ հոգևորականները և,

⁹⁷ Դ ր ա ս ի ա ն ա կ ե Ր տ ց ի. 2010, 563–564:

⁹⁸ Արծրունի պատմիչի վկայությամբ՝ 893 թ. Դվինի երկրաշարժի հետևանքով ավերվում են կաթողիկոսարանն ու կաթողիկե եկեղեցին, այդ պատճառով Գևորգ Գառնեցի կաթողիկոսը հեռանում է Դվինից և հաստատվում Վաղարշապատում: Նա նստավայր է դարձնում Ներսես Բ կաթողիկոսի կառուցած Զվարթնոցի եկեղեցին (Ա ր ծ ր ու ն ի եւ Ա ն ա ն ու ն. 2010, 239): Ենթադրում են, որ Դվինի կաթողիկոսարանն արաբներն ավելի ուշ վերածել են մզկիթի (Ղ ա ֆ ա դ ա ր - յ ա ն. 1952, 120):

⁹⁹ Դ ր ա ս ի ա ն ա կ ե Ր տ ց ի. 2010, 565–566:

Հատկապես, ոմն «դատաւոր անկանոն կրանիցն Մահմետի», տարհամոզում են Նասրին, խորհուրդ տալիս ձերբակալել Հայոց հոգևոր առաջնորդին և բռնագրավել նրա ունեցվածքը: Հայոց կաթողիկոսի խոսքերից հասկացվում է, որ իսլամ հոգևորականների և իր միջև գոյություն է ունեցել կրոնական անհանդուրժողականություն¹⁰⁰: Նասրն արաբական գործողատ է ուղարկում Այրիվանք, ավերում և կողոպտում այն, կոտորում վանականներին: Իմանալով այդ մասին՝ կաթողիկոսը Բյուրականից տեղափոխվում է Բագարան, «առ թագաւորեալն Աշոտ»՝ Աշոտ Երկաթի մոտ¹⁰¹: Բյուրականը ենթարկվում է կատաղի հարձակման: Կաթողիկոսի հետ եղած Սահակ եպիսկոպոսը հիվանդության պատճառով չի կարողանում փախչել: Նրա հետ մնում են կաթողիկոսական եկեղեցու քահանաներն ու սարկավազները: Վերջիններս որոշում են դիմադրել արաբներին, ուստի հավաքում են գյուղում եղած այն բոլոր մարդկանց, որոնք կարող էին զենք գործածել, և ամրանալով «ի դուռն ամրոցական»՝ սպասում են Նասրի զինվորներին: Թշնամին պաշարում է ամրոցը և «աւուրս եաւթն... ոչ կարէին ստնանել ամրոցին», մինչև որ ներսից «գողորմութիւն եւ զհաւատս ուրացեալ» մի քանի դավաճաններ մատնում են «ի ծածուկ ի գիշերի զամրոցն ի ձեռս թշնամեաց»¹⁰²: Կատաղած թշնամին ներխուժելով սրի է քաշում Սահակ եպիսկոպոսին, Մովսես, Սարգիս և Դավիթ քահանաներին, որոնք եղբայրներ էին, Սահակ կրոնավորին, Սողոմոն Սագաստանցի ճգնավորին ու Թեոդորոս սարկավազին, «որ վերակացու շինուածոյ եկեղեցւոյն էր եւ մարգիչ մարդկանն»: Սպանվում են նաև երկու հարյուր բյուրականցիներ: Փրկվում է միայն Գէորգ սարկավազը, որն էլ ամրոցի հերոսական և ողբերգական պաշտպանության սարսափելի եղելությունը փոխանցում է կաթողիկոսին: Բնակիչների մի մասը՝ այդ թվում կանայք, գերի են տարվում Դվին: Ազատ արձակված մահմեդական մշակներն առաջարկում էին հայերին «երթալ խառնիլ ի նոսա» և խուսափել մահից, սակայն քրիստոնյաները չեն համաձայնում: Նասրը կարգադրում է ազատ արձակել իր մոտ բերված գերիներին, իսկ նրանց, ովքեր մատնել էին ամրոցը «հրամայէ սրով սատակել»:¹⁰³ Միայն երկու բյուրականցիներ՝ Կիրակոս զինվորը և Կիրակոս մշակը, մահմեդականություն չընդունելու համար գլխատվում են: Բյուրականի եղեռնագործությունը տեղի է ունեցել ահեկան ամսի 10-ին, իսկ երկու Կիրակոսների վկայությունը՝ նույն ամսի 17-ին¹⁰³: Պատմիչի խոսքերով այս իրադարձություն-

¹⁰⁰ Նասրը մոլեռանդ մահմեդական հոգևորականների ազդեցությամբ հայերին պարտադրում է ընդունել իսլամական կրոնը (Г р е н. 1893, 96):

¹⁰¹ Մ. Չամչյանը նշում է, որ կաթողիկոսը գնում է «առ Աշոտ բռնաւոր հորեղբորորդի արքային Աշոտոյ» (Չ ա մ չ յ ա ն. 1984, 809): Մ. Օրմանյանն ու Լեոն ա յ ա Աշոտին նույնացնում են Աշոտ Շապուհյանի հետ (Օ Ր մ ա ն ե ա ն. 2001, 1236, Լ ե ո. 1967, 569–570): Ա. Եղիազարյանն իրավացիորեն պնդում է, որ Հայոց կաթողիկոսն ապաստան է գտել ոչ թե Աշոտ Շապուհյանի, այլ՝ Աշոտ Երկաթի մոտ, որին պատմիչն անվանում է «գթագաւորագուն բողբոջ» (Ե Ղ ի ա զ ա Ր յ ա ն. 2016, 81: Հմմտ. Չ ա Ր Բ Հ ա ն ա լ ե ա ն. 1897, 515):

¹⁰² Դ ր ա ս խ ա ն ա կ եր տ ց ի. 2010, 571, Չ ա մ չ յ ա ն. 1984, 809:

¹⁰³ Օ Ր մ ա ն ե ա ն. 2001, 1237–1238, Յ ա ս մ ա լ ու Ր ք. ահեկի 12, որը համապատասխանում է ապրիլի 19-ին:

ները տեղի են ունեցել «յերեքհարիւրերորդի եւթանասուներորդի երկրորդի (923) թուականութեանն թորգոմեան եւ Ահկի ամսոյ, որ աւր տասն»¹⁰⁴:

Հայրապետական աթոռի տեղափոխութիւնը Դվինից Աղթամար

Բյուրականի մարտերից հետո Նասրը «գիւղաւք եւ գերդաստանաւք» բռնազավթում է կաթողիկոսարանի ունեցւածքը: Առանց կաթողիկոսական աթոռի մնացած Դվինում հայ տարրը ավելի է թուլանում¹⁰⁵: Հովհաննես կաթողիկոսը, որն է տեղից օգնութեան հույս չունենալով, շուրջ մեկ տարի՝ 923 թվականից մինչև 924 թվականի «ամառնայինն յաշունն յեղանակեալ յեղափոխէր», մնում է Բագարանում Աշոտ արքայի մոտ՝ նրանից առատաձեռնութեամբ ստանալով «բազմաբար բարեաց մտաց բարութիւն եւ լրութիւն սիրոյ»¹⁰⁶: 924 թ. աշնանը «առ ի նմանէն (Աշոտ Երկաթից—Վ. Ա.) յուղարկեալ» կաթողիկոսը գնում է Վասպուրական՝ «առ թագաւորն Հայոց Գագիկ»¹⁰⁷: Վերջինս կաթողիկոսին ընդունում է «հոգեւոր սիրոյ հարազատութեամբ եւ հաստատուն հաւատով եւ աներկբայ յուսով» ու իր եղբայր Գուրգենի հետ նրան առնում վատահելի հովանու տակ: Այդ ժամանակ Դվինը դեռևս Նասրի տնօրինութեան տակ էր: Գագիկ Արծրունին հուսադրում է վտարանդի առաջնորդին, խոստանում ազատագրել Դվինի կաթողիկոսարանը՝ հավաստիացնելով, որ «ոգևով չափ ջան ի մտի եղեալ հոգասցի վասն դարձի մերոյ ի բնակութիւնս մեր»:

Հավանական է, որ Վասպուրական մեկնելու՝ Հովհաննես Դրասխանակերտցու վճիռը հետևանք էր այն հանգամանքի, որ 923 թ. նրա անհաշտ թշնամին՝ Յուսուֆը, ազատվել էր բանտից և վերստին նշանակվել Ատրպատականի ամիրա¹⁰⁸: Վասպուրականն այդ ժամանակ Հայաստանի ամենաապահով վայրերից մեկն էր¹⁰⁹, իսկ թագավոր Գ. Արծրունին իր կարողութիւններով ոչ միայն չէր գիշում Բագրատունի գահակալին, այլև ինչ որ տեղ ավելի ազդեցիկ էր: Գաղտնիք չէ՝ Արծրունիներն ունեցել են Հայաստանի հոգեւոր կենտրոնը իրենց տիրութեան տեղափոխելու հավակնութիւններ, և պատահական չէ, որ կաթողիկոսը Վասպուրական տեղափոխվելու շարժառիթներից մեկն էլ նշում է՝ «ըստ միշտն հրաւիրանի կոչման նորա (Գագիկ Արծրունու—Վ. Ա.)»: Այս գործընթացի մեջ կա ուշագրավ մի վկայութիւն, որը, ինչպես իրավացիորեն նկատում է Աշոտ Երկաթի դարաշրջանը մանրակրկիտ քննութեան ենթարկած Ա. Եղիազարյանը, Դրասխանակերտցին չեչտում է հայոց հոգեւոր աթոռի

¹⁰⁴ Դրասխանակերտցի. 2010, 574, Չամչյան. 1984, 808: Մ. Օրմանյանի կարծիքով՝ Բյուրականի դեպքերը տեղի են ունեցել 926 թ. (Օրմանյան. 2001, 1238):

¹⁰⁵ Տեր-Ղևոնդյան. 1965, 138:

¹⁰⁶ Դրասխանակերտցի. 2010, 579:

¹⁰⁷ Վարդանյան. 1988, 122: Վ. Վարդանյանի կարծիքով՝ առանց Հայոց կաթողիկոսութեան նկատմամբ իրավասութիւններ ունենալու Գագիկ Արծրունին չէր կարող հավակնել հայոց գահին: Այդ պատճառով վերջինս հրավիրում է Դրասխանակերտցուն Աղթամար, որն ավելի է բարձրացնում Արծրունիների հեղինակութիւնը (Վարդանյան. 1980, 219):

¹⁰⁸ Իբն ալ-Ասիր. 1981, 174:

¹⁰⁹ Տեր-Ղևոնդյան. 1965, 140:

երկփեղկման մեջ սերունդների կողմից հետագայում չմեղադրվելու համար: Կաթողիկոսը նշում է, որ ինքը Գ. Արծրունու մոտ «յուզարկեալ» էր անձամբ Աշոտ թագավորի կողմից: Երկարատև թափառումներից հետո, Դվինի թալանվածության և անապահովության պայմաններում կաթողիկոսի Վասպուրական տեղափոխվելը հայոց հոգևոր իշխանության ընտրությունն էր՝ հօգուտ Վասպուրականի թագավորության, ուստի հեռատես հոգևոր առաջնորդը իրեն ապահովագրում է Աշոտ Երկաթի հորդորին անսպուլ փաստով¹¹⁰: Հայ մատենագիրները մեղադրական չեչտադրմամբ են հիշատակում Գ. Արծրունու թագավոր դառնալը՝ այդ փաստը համարելով հայոց միասնական թագավորության մասնատման պատճառ: Ուստի Բագրատունյաց տիրություններից անցնելով Վասպուրական՝ կաթողիկոսն անցնում է Բագրատունի գահակալի հակառակորդի կողմը: Եվ, որպեսզի տարիներ հետո ընթերցողն իրեն չմեղադրի այդ քայլի համար, կաթողիկոսը գրում է, թե Աշոտ Երկաթն է իրեն ուղարկել Գ. Արծրունու մոտ:

Գ. Արծրունին խոստանում է կաթողիկոսին վերադարձնել նրա ունեցվածքը: Մինչ այդ նա Գագիկին երբեք «Հայոց թագավոր» չէր կոչել, այլ միայն՝ «թագավոր»¹¹¹: Հայոց հայրապետն իր բազմաչարհար կյանքի վերջին շրջանն անցկացնում է Վասպուրականում, ուր տեղափոխել էր կաթողիկոսարանը: Հավանաբար, նա զբաղվել է նաև նոր կաթողիկոսարանի՝ Աղթամարի կաթողիկե եկեղեցու բարեկարգմամբ¹¹²: Այստեղ էլ ավարտում է իր իսկ բնորոշած «հեզ և թշվառական» կյանքը: Թաղվում է Ձորովանքում, Գևորգ Գառնեցի կաթողիկոսի շիրիմի հարևանությամբ: Հայ մատենագիրների վկայությամբ՝ Հովհաննես Դրասխանակերտցին ավտոակալել է 27 կամ 28 տարի¹¹³:

Հովհաննես Դրասխանակերտցու մահվան թվականը վերջնականապես ճշտված չէ: Ըստ Մ. Ջամչյանի՝ նա մեկնել է Վասպուրական 924 թ., որտեղ մահացել է 925 թ.¹¹⁴: Մ. Օրմանյանը կարծում է, որ նա Վասպուրական է տեղափոխվել 927 թ., իսկ մահացել՝ 929 թ.¹¹⁵: Դրասխանակերտցու աշխատությունների վերջին հրատարակության խմբագրական նախաբանում Գ. Տեր-Վարդան-

¹¹⁰ Եղիազարյան. 2016, 82:

¹¹¹ Պատմության մեջ կաթողիկոսը մի քանի անգամ փոխում է Աշոտ Երկաթին և Գագիկ Արծրունուն տված իր բնորոշումները: Հավանաբար, նա հիշյալ գործիչներին գնահատել է առանձին քաղաքական դեպքերում՝ նրանց կատարած արարքներով (Դրասխանակերտցի. 1986, 14):

¹¹² Օրմանյան. 2001, 1240:

¹¹³ Ստ. Օրբելյանի վկայությամբ՝ Դրասխանակերտցին ավտոակալել է 27 տարի (Ստեփանյանի Սիւնեացեպիսկոպոսի. 1861, 366), Ասողիկի վկայությամբ՝ Հովհաննեսի ավտոակալությունը տևել է ԻԲ տարի (22), հավանաբար, թվատառերի չփոխություն կա և պետք է լինի ԻԸ տարի (28) (Ասողիկ. 2010, 742): Մխիթար Անեցու մոտ նշված է ԻԸ տարի (28) (Մխիթար Անեցի. 1983, 69): Ժամանակագիր Սամվել Անեցին նույնպես հիշատակում է ԻԸ տարի (28) (Սամուէլ Անեցի եւ շարունակողներ. 2014, 169, Գանձակեցի. 1961, 81–82):

¹¹⁴ Ջամչյան. 1984, 815–816:

¹¹⁵ Օրմանյան. 2001, 1240, 1242:

յանը կարծիք է հայտնում, որ կաթողիկոսը Վասպուրական է մեկնել 927 թ. և այնտեղ վախճանվել 929 թ.¹¹⁶։ Բազմակողմանիորեն վերլուծելով IX դ. վերջի և X դ. առաջին կեսի հայոց հայրապետերի աթոռակալության ժամանակագրությունը՝ Ա. Եղիազարյանը հիմնավորում է, որ Դրասխանակերտցին վախճանվել է 925 թ.¹¹⁷։

Եզրակացություն

Հովհաննես Դրասխանակերտցին աթոռակալել է դարաշրջանային բնույթ ունեցող մի պատմափուլում, երբ նորաստեղծ Հայոց պետականությունը դիմադրապիսի էր արտաքին և ներքին բարդ մարտահրավերներ, իսկ եկեղեցին ենթարկվում էր ծանր փորձությունների։ Զարգացած ավատատիրության դարաշրջանին բնորոշ իշխանական տների հակամարտությունները պառակտում էին Հայաստանը և խաթարում նրա քաղաքական ամբողջականությունը։ Այս վիճակն իրական վտանգ էր ծնում նաև Հայոց եկեղեցու անկախության և դավանական ինքնուրույնության համար։ Ուստի Հայոց կաթողիկոսն ամեն գնով սատարում էր Հայաստանի քաղաքական միասնության պահպանմանը նպատակաուղղված ջանքերին։ Հայրենասեր պատմիչը գործուն միջամտություն էր ունենում իշխանական հակամարտությունների լուծմանը, հաճախ էր հաշտեցնում թշնամացած իշխաններին, որոնք դեռևս հունեին ազգային համընդհանուր շահի գիտակցում և նորաստեղծ պետության ու միասնական հայրենիքի գաղափար։ Որպես Հայոց հոգևոր առաջնորդ իրեն պատասխանատու էր գտնում եղբայրասպան կոխիների համար՝ որակելով դրանք իբրև «աղետագոյն աղետք ազգապղծութեան»։

Հայոց հովվապետի գործունեության աշխարհագրությունն ընդգրկում էր ոչ միայն Հայաստանը, այլև Հարավային Կովկասը, քանի որ նա արաբների դեմ համակուլկասյան դաշնակցության ձևավորման նախաձեռնողներից և գործուն դերակատարներից էր։ Երկրում ստեղծված բարդ քաղաքական իրավիճակում և հակադիր կողմորոշումների հանգույցում, կարևոր նշանակություն ունեւր Հայոց եկեղեցու ղեկավարի դիրքորոշումը։ Իրատես մատենագիր-կաթողիկոսը գործնական քայլերի է դիմում հարևան մուսուլման ամիրաների հետ հաշտության եզրեր գտնելու և նրանց հետ բարիդրացիական հարաբերություններ հաստատելու ուղղությամբ։ Նա մեկնում է Ատրպատականի Սաջյան ամիրա Յուսուֆի մոտ, սակայն նրա դիվանագիտական առաքելությունը Հայաստանի ներքին պառակտվածության պատճառով ցանկալի արդյունք չի տալիս։ Այդքանից հետո կաթողիկոսը կողմնորոշվում է դեպի քրիստոնյա հարևանը, ինչը համահունչ էր Հայաստանին տիրելու Բյուզանդիայի արևելյան քաղաքականության ծրագրերին։ Հայաստանի փրկությունը Դրասխանակերտցին տեսնում էր Բյուզանդիայի հովանավորությունը ընդունելու մեջ և այդ նպատակով նամակով դիմում է Բյուզանդական արքունիքին։

¹¹⁶ Դրասխանակերտցի. 2010, 317:.

¹¹⁷ Եղիազարյան. 2020, 174:

Լինելով հայ-բյուզանդական քաղաքական դաշինքի ջերմ պաշտպան՝ անգիջում դիրքորոշում ուներ եկեղեցիների մերձեցման հարցում: Նրա համար քաղկեդոնականության դեմ պայքարն առաջին հերթին պայքար էր Հայոց պետության քաղաքական անկախության և Հայոց եկեղեցու դավանանքային ինքնուրույնության համար:

Հովհաննես Դրասխանակերտցին Հայոց եկեղեցու պատմության մեջ մնում է որպես հմուտ պատմաբան, լայնախոհ քաղաքական գործիչ ու դիվանագետ, եկեղեցու իրավունքների և դավանաբանության անգիջում պաշտպան, միասնության ու պետականության գաղափարախոս կաթողիկոս:

Վարդան Ալեքսանյան – պ. գ. թ., ԵՊՀ ԻՋևանի մասնաճյուղի Հայոց պատմության և հասարակագիտության ամբիոնի դասախոս, դոցենտ: Գիտական հետաքրքրությունը՝ Հայոց եկեղեցու պատմությունն ալատատիրության դարաշրջանում: Հեղինակ է 3 ուսումնամեթոդական ձեռնարկի և շուրջ 20 հոդվածի: vardanalexanyan406@gmail.com

ԳՐԱԿԱՆՈՒԹՅՈՒՆ

- Աբեղյան Մ. 1968, Երկեր, հ. Գ, Երևան, ՀՍՍՀ ԳԱ հրատ., 693 էջ:
- Ադոնց Ն. 2012, Երկեր, հ. Ե, Երևան, ԵՊՀ հրատ., 656 էջ:
- Աճառյան Հ. 1946, Հայոց անձնանունների բառարան, հ. Գ, Երևան, Պետական համալսարանի հրատ., 741 էջ:
- Անանեան Պ. 1997, Ներսես Շնորհալի, Հայ-բիզանդական եկեղեցական յարաբերություններ. – «Բազմավեպ» (Վենետիկ), № 1–4, 49–76 էջ:
- Առաքելյան Ա. 1959, Հայ ժողովրդի մտավոր մշակույթի զարգացման պատմություն, հ. Ա, Երևան, Հայպետ հրատ., 724 էջ:
- Բախչինյան Հ. 1976, Հովհաննես Դրասխանակերտցու պատմության գրության ժամանակը. – «Բանբեր Երևանի համալսարանի», № 3, 122–126 էջ:
- Բախչինյան Հ. 1973, Հովհաննես կաթողիկոս Դրասխանակերտցի. – Էջմիածին, Գ, 43–47 էջ:
- Բարթիկյան Հ. 1966, Կոստանդնուպոլսի պատրիարք Նիկողայոս Միստիկոսի 101-րդ և 139-րդ թղթերը՝ ուղղված Հովհաննես Դրասխանակերտցուն և Սմբատ Ա թագավորին. – ՊԲՀ, № 4, 251–256:
- Բարթիկյան Հ. 1996, Բյուզանդիան և հայ պետականությունը. – ՀՀ ԳԱԱ «Լրաբեր հասարակական գիտությունների», № 1, 17–29:
- Գրիգորյան Գ. 1983, Տարոնի Բագրատունիների ֆեոդալական իշխանությունը IX–XI դարերում, Երևան, ՀՍՍՀ ԳԱ հրատ., 196 էջ:
- Դանիելյան Է. 1977, Բյուզանդական արշավանքները Հայաստան (X դարի առաջին քառորդ). – ՀՀ ԳԱԱ «Լրաբեր հասարակական գիտությունների», № 2, 61–74:
- Դարբինյան-Մելիքյան Մ. 1981, Դիտողություններ Հովհաննես Դրասխանակերտցու «Պատմութեան» վերաբերյալ. – ՊԲՀ, № 3, 154–164:
- Եղիազարյան Ա. 2011, Հայ Բագրատունիների տերությունը (885–908), Երևան, ԵՊՀ հրատ., 392 էջ:

Եղիազարյան Ա. 2014, Հայոց Սմբատ Ա թագավորի գահակալության շրջանի ժամանակագրությունը. – «Էջմիածին», № 5, 38–51 էջ:

Եղիազարյան Ա. 2016, Աշոտ Երկաթ. թագավոր հայոց, Երևան, ԵՊՀ հրատ., 117 էջ:

Եղիազարյան Ա. 2018, Վրաց Բագրատունիների թագավորության ձևավորման գործընթացը, Երևան, ԵՊՀ հրատ., 131 էջ:

Եղիազարյան Ա. 2020, IX դարի վերջի և X դարի առաջին կեսի Ամենայն հայոց կաթողիկոսների աթոռակալության ժամանակագրության շուրջ, Աստվածաբանական և կրոնական հոդվածների ժողովածու, Գ, 161–178:

Եղիշէի վասն Վարդանայ եւ հայոց պատերազմին. 1957, ի լոյս ընծ. բաղդատ. ձեռագրաց աշխատ. Ե. Տէր-Մինասեան, Երևան, ՀՍՍՀ ԳԱ հրատ., 223 էջ:

Զարբհանալեան. 1897, Հայկական հին դպրութեան պատմութիւն, Վենետիկ, Մխիթարեան տպ., 822 էջ:

Թեոփանեսի շարունակող. 1990, Օտար աղբյուրները Հայաստանի և հայերի մասին, 15, Բյուզանդական աղբյուրներ, Ե, թարգմ. բնագրից, առաջաբան և ծանոթ. Հ. Բարթիկյանի, Երևան, ՀԽՍՀ ԳԱ հրատ., 438 էջ:

Թովմա Արծրունի եւ Անանուն. 2010, Պատմութիւն տանն Արծրունեաց, Մատենագիրք հայոց, հ. ԺԱ, Ժ դար, Պատմագրութիւն, Գիրք Ա, Լիբանան-Անթիլիաս, ԵՊՀ հրատ., 795 էջ:

Իբն ալ-Ասիր. 1981, Օտար աղբյուրները Հայաստանի և հայերի մասին, 11, Արաբական աղբյուրներ, Բ, թարգմ. բնագրից, առաջ. և ծանոթ. Ա. Տեր-Ղևոնդյանի, Երևան, ՀՍՍՀ ԳԱ հրատ., 442 էջ:

Լեո. 1967, Երկերի ժողովածու, հ. Բ, Երևան, Հայաստան հրատ., 786 էջ:

Կիրակոս Գանձակեցի. 1961, Պատմություն հայոց, աշխատ. Կ. Մելիք-Օհանջանյանի, Երևան, ՀՍՍՀ ԳԱ հրատ., 426 էջ:

Կոստանդին Ծիրանածին. 1970, Օտար աղբյուրները Հայաստանի և հայերի մասին, հ. 6, Բյուզանդական աղբյուրներ Բ, թարգմ. բնագրից, առաջաբան և ծանոթ. Հր. Բարթիկյանի, Երևան, ՀՍՍՀ ԳԱ հրատ., 367 էջ:

Հայ ժողովրդի պատմություն. 1976, հ. Գ, Հայաստանը զարգացած ֆեոդալիզմի դարաշրջանում (IX դ. կեսերից մինչև XIV դ. կեսերը), Երևան, ՀՍՍՀ ԳԱ հրատ., 1023 էջ:

Հայոց պատմություն. 2014, հ. Բ, Միջին դարեր (IV–XVII դարի առաջին կես), Գիրք II, (IX դարի կես– XVII դարի առաջին կես), Երևան, Զանգակ-97 հրատ., 800 էջ:

Հաւաքումն պատմութեան Վարդանայ վարդապետի. 1862, Վենետիկ, Սբ. Ղազարի տպ., 184 էջ:

Հովհաննիսյան Պ. 2014, Երկու ուղղություն X դարի հայ պատմագրության մեջ. – «Հայագիտության հարցեր», 108–120 էջ:

Մանր ժամանակագրություններ, XIII–XVIII դդ. 1956, կազմեց՝ Վ. Հակոբյան, հ. Բ, Երևան, ՀՍՍՀ ԳԱ հրատ., 684 էջ:

Ղաֆադարյան Կ. 1952, Ղվին քաղաքը և նրա պեղումները, հ. I, Երևան, ՀՍՍՀ ԳԱ հրատ., 159 էջ:

Ղաֆադարյան Կ. 1982, Ղվին քաղաքը և նրա պեղումները, հ. II, Երևան, ՀՍՍՀ ԳԱ հրատ., 163 էջ:

Մովսէս Խորենացի. 1991, Պատմութիւն հայոց, քնն. բնագիրը և ներած.՝ Մ. Աբեղեանի եւ Ս. Յարութիւնեանի, Երևան, ՀԽՍՀ ԳԱ հրատ., 485 էջ:

Մխիթար Անեցի 1983, Մատեան աշխարհավէպ հանդիսարանաց, թարգմ. Հ. Մարգարյանի, Երևան, ՀՍՍՀ ԳԱ հրատ., 140 էջ:

Յայսմաւորք. 1730, Մարերի Ի և մայիսի ԻԷ, վկայաբանութիւն սրբոյն Թէոդորայ և Դիդիմայ և Դաւթի, Կ. Պոլիս:

Յովհաննու կաթողիկոսի Դրասխանակերտւոյ. 2010, Պատմութիւն Հայոց, Մատենագիրք հայոց, ԺԱ հատոր, Ժ դար, Պատմագրութիւն, գիրք Ա, Անթիլիաս-Լիբանան, ԵՊՀ հրատ., 795 էջ:

Չամչյան, Մ. 1984, Հայոց պատմություն, հ. Բ, Երևան, ԵՊՀ հրատ., 1060 էջ:

Սահակյան Ա. 2005, Երվանդյան մայրաքաղաքի հիմնարկերի պաշտամունքային հայեցակարգն ըստ Մ. Խորենացու (Երվանդակերտ, Դրասխանակերտ, մ. թ. ա. III–II դդ.) | ՀՀ ԳԱԱ Զեկույցներ, № 3 (հատ. 105) 8 էջ:

Սամուէլ Անեցի եւ շարունակողներ. 2014, աշխատ. Կ. Մաթևոսյանի, Երևան, Նաիրի հրատ., 502 էջ:

Սարգսյան Ա. 1991, Հովհաննես Դրասխանակերտցու «Հայոց պատմությունը» և Մովսէս Խորենացին, Երևան, ՀԽՍՀ ԳԱ հրատ., 328 էջ:

Ստեփանոս Տարաւնեցի Ասողիկ. 2010, Պատմութիւն Տիեզերական, Մատենագիրք հայոց, ԺԵ հատոր, Ժ դար, Պատմագրութիւն, գիրք Բ, Անթիլիաս-Լիբանան, ԵՊՀ հրատ., 893 էջ:

Ստեփաննոսի Սիւնեաց եպիսկոպոսի Պատմութիւն տանն Սիսական. 1861, լոյս ընծայեաց, Մ. Էմին, Մոսկվա, Տպարան Լազարեան Ճեմարանի, 386 էջ:

Վարդանյան Վ. 1988, Հովհաննես Դրասխանակերտցու կյանքի վերջին շրջանի մասին. – ՊԲՀ, № 3, 114–125 էջ:

Վարդանյան Վ. 1969, Վասպուրականի Արծրունյաց թագավորությունը. 908–1021 թթ., Երևան, ԵՊՀ հրատ., 290 էջ:

Վարդանյան Վ. 1980, Վասպուրականի 910–930-ական թթ. պատմության շուրջ. – ՊԲՀ, № 1, 215–222:

Տեր-Ղևոնդյան Ա. 1965, Արաբական ամիրայությունները Բագրատունյաց Հայաստանում, Երևան, ՀՍՍՀ ԳԱ հրատ., 312 էջ:

Օրմանեան Մ. 2001, Ազգապատում, հ. Ա, Մայր Աթոռ Սուրբ Էջմիածին, 1870 էջ:

Васильев А. 1902, Политические отношения Византии и арабов за время Македонской династии (867–959). – Записки историко-филологического факультета императорского С.-Петербургского университета, ч. LXVI. СПб., Типография И. Скороходова, 220 с.

Грен А. 1893, Династия Багратидов в Армении. – «Журнал министерства народного просвещения» (СПб.), ССХС, № 11., Типография В. Балашева, с. 52–139.

Драсханакертци Иованнес. 1986, История Армении, пер. с древнеармянского, вступ. статья и коммент. М. Дарбинян-Меликян. Ереван, «Советакан грох», 395 с.

Периханян А. 1993, Материалы к этимологическому словарю древнеармянского языка. Ереван, Инст. востоковедения НАН РА, 144 с.

Тер-Гевондян А. 1977, Армения и арабский халифат. Ереван, Изд. АН АрмССР, 320 с.

Юзбашян К. 1988, Армянские государства в эпоху Багратидов и Византия IX–XI вв. М., «Наука», 300 с.

Yovhannes Drasxanakertci. 1987, History of Armenia, translation and com. by Rev. Krikor H. Maksoudian, Scholars press, Atlanta, Georgia, 372 p.

ОВАННЕС ДРАСХАНАКЕРТЦИ – КАТОЛИКОС-ИДЕОЛОГ АРМЯНСКОЙ ГОСУДАРСТВЕННОСТИ

ВАРДАН АЛЕКСАНИЯ

Резюме

Ключевые слова: Ованнес Драсханакертци, Смбат I, Ашот Железный, Юсуф, единство, примирительное посредничество, князья, межкняжеские противоборства, политическая целостность, идеолог, гонение, переписка, Византия, Двин, Васпуракан, арабские набеги.

Ованнес Драсханакертци (898–925) возглавлял католикосский престол в исторический период эпохального характера, когда новосозданная армянская государственность столкнулась со сложными внешними и внутренними вызовами, а церковь подверглась суровым испытаниям. Конфликты правящих домов, характерные для эпохи развитого феодализма, разделили Армению и подорвали ее политическую целостность. Эта ситуация представляла реальную угрозу независимости страны и конфессиональной независимости Армянской церкви. Поэтому армянский патриарх поддержал усилия, направленные на сохранение политического единства Армении любой ценой. Патриот-историк активно вмешивался в решение межкняжеских конфликтов, часто мирил враждующих между собой князей, у которых еще не было сознания всеобщего национального интереса и идеи вновь созданного государства и единой родины.

География деятельности армянского патриарха включала не только Армению, но и Южный Кавказ. Он был одним из инициаторов и активных участников формирования общекавказского союза против арабов. Католикос-летописец предпринимает практические шаги, чтобы заключить мир с соседними мусульманскими эмирами и установить с ними дружеские отношения. С этой целью он отправляется к амиру Юсуфу Атрпатакана, но его дипломатическая миссия не дает желаемого результата из-за внутреннего раскола Армении. После этого он ориентировался в сторону христианского соседа, что полностью соответствовало планам восточной политики Византии по господству над Арменией. Драсханакертци видел спасение Армении в принятии покровительства Византии и с этой целью написал письмо византийскому двору. Являясь горячим приверженцем

армяно-византийского политического союза, он занимал бескомпромиссную позицию в отношении сближения церквей. Для него борьба против халкидонизма была прежде всего борьбой за политическую независимость армянского государства и конфессиональную независимость Армянской церкви. Ованес Драсханакертци остался в истории Армянской церкви искусным историком, широко мыслящим политиком и дипломатом, бескомпромиссным защитником прав и вероучения Армянской церкви, идеологом единства и государственности.

Вардан Алексанян – к. и. н., преподаватель кафедры истории Армении и обществоведения Иджеванского филиала ЕГУ, доцент. Научные интересы: история Армянской церкви в период феодализма. Автор 3 учебно-методических пособий и около 20 статей. vardanalexanyan406@gmail.com

HOVHANNES DRASKHANAKERTSI,
CATHOLICOS-IDEOLOGIST OF ARMENIAN STATEHOOD

VARDAN ALEXANYAN

Summary

Keywords: Ovannes Draskhanakertci, Smbat I, Ashot the Iron, Yusouf, solidarity, conciliatory mediation, princes, inter-princely confrontations, political integrity, ideologist, persecution, correspondence, Byzantium, Dvin, Vaspurakan, Arab raids.

Hovhannes Draskhanakertsi headed the catholicos throne during an epochal historical period, when the newly created Armenian statehood faced difficult external and internal challenges, and the church was severely tested. The conflicts of the ruling houses, characteristic of the era of developed feudalism, divided Armenia and undermined its political integrity. This situation posed a real threat to the independence and confessional independence of the Armenian Church. Therefore, the Armenian Patriarch supported the efforts aimed at preserving the political unity of Armenia at any cost. The Patriot Historian actively intervened in resolving inter-princely conflicts, often reconciling princes who were at war with each other, who did not yet have a consciousness of a universal national interest and the idea of a newly created state and a single homeland.

The geography of the activities of the Armenian Patriarch included not only Armenia, but also the South Caucasus. He was one of the initiators and active participants in the formation of a pan-Caucasian alliance against the Arabs. The realistic chronicler takes practical steps to make peace with neighboring Muslim emirs and establish friendly relations with them. To this end, he goes to emir Yusuf Atrpatakan, but his diplomatic mission does not give the desired result due

to the internal split of Armenia. After that, he orientated on the Christian neighbor, which fully corresponded to the plans of the Eastern policy of Byzantium to dominate Armenia. Draskhanakertsi saw the salvation of Armenia in accepting the patronage of Byzantium and for this purpose wrote a letter to the Byzantine court. Being an ardent supporter of the Armenian Byzantine political union, he took an uncompromising position regarding the rapprochement of the churches. For him, the struggle against Chalcedonism was primarily a struggle for the political independence of the Armenian state and the confessional independence of the Armenian Church. Hovhannes Draskhanakertsi remained in the history of the Armenian Church as a skilled historian, a broad-minded politician and diplomat, an uncompromising defender of the rights and dogma of the Armenian Church, an ideologist of unity and statehood.

Vardan Alexanyan – Candidate of Historical Sciences, Associate Professor, Lecturer at the Department of Armenian History and Social Science, Branch of YSU in Ijevan. Scientific interests: History of the Armenian Church in the Middle Ages. Author of 3 educational-methodical manuals and about 20 scientific articles. vardanalexanyan406@gmail.com